

ASO LULU, 24 FEPUARI 2021

Na nofoia e le Fofoga Fetalai le Nofoa i le itula e 9:13 i le taeao.

Tatalo.

FOFOGA FETALAI: Ou te faasilasila atu ua toe amatalia Tualumaga ma Galuega a le Fono Aoaofa Faitulafono.

TUUINA ATU O PEPA

Na tolaulauina e le Failautusi le Faasologa o le Tuuina atu o Pepa e tusa ai ma T.T.49(2).

1. S.R.2021/5, Tulafono o le Ulufale mai o Tagata 2020 – Faasilasilaga o le Amata Faamamaluina.

TULAFONO TAU FAAOFI O LE FAATATAUINA O TUPE FAAOPOOPO (NU.1) 2020/2021 – felafolafoaiga faaaauu i luga o le faitauga faalua – Aso 26

FOFOGA FETALAI: E tolopo Galuega a le Fono Aoaofa Faitulafono i le aso ananafi o lo o faapena ona saunoa le Afioga i le Minisita o Faalapotopotoga Tumaoti a le Malo.

Ia, ma lou faaaloalo ou te tapa lau Afioga i le Minisita. Sa logo i tino matagi lelei i le saunoaga ananafi i le faafofoga a le atunuu aemaise lenei Palemene aemaise foi o le itumalo. E i ai le manatu ua lamalama faaiu foi le saunoaga i lau Afioga, ia tulai maia e faaaauu le saunoaga e tusa ai o le tatou galuega.

Afioga Hon LAUTAFI FIO SELAFI PURCELL (Minisita mo Pisinisi, Alamanuia ma Leipa): Faafetai i lau Afioga i le Fofoga Fetalai. E faatalofa atu foi i le mamalu o sui usufono uma ua usu mai i lenei taeao i le louloua o le tau. Ia lea ua uma ona e momoli lapalapa o Malo e lau Afioga, ua toto foi le niu o le tuaoi i lo tatou vatapuia ma lo tatou Matai Sili. Ona manatu lea, tatou sii lea o le viiga lena. O le fiafiaga o le loto, o Lana tausiga, lea ua toe tilotilo atu ua toe afifio mai sui usufono i lenei taeao i Lona alofa ma Lona agalelei.

Lau Afioga sa faaiuiu le lauga ananafi. Faafetai mo le avanoa ua toe maua i lenei taeao. E le toe umi lava foi se tala a Satupaitea. Ae ou te le i oo atu i si ou itumalo lau Afioga i le Fofoga Fetalai, e tau lava ina oo atu se tala a le sui usufono o Satupaitea faapea si ou itumalo i lau Afioga. E molimoli atu le faafetai ma le faamalo i lou faatautaia o le Fonousu a Samoa, amata mai lena 5 tausaga seia oo mai i le taimi lenei. Lau Afioga, ou te nofonofo lava ma ou faapea ifo, se amuia, amuia lenei Paeaiga lea ou te i ai na maua mai se Fofoga Fetalai pei o lau Afioga. E oo mai lava i le taimi lenei lau Afioga, na o le loto lava o le fia faafetai ma le faamalo. E ui i le sousou o le tatou Paeaiga i Fonotaga mai lea taimi, ia sa toa lava lau Afioga e faafoe le tatou Fonotaga i tu ma aga a lo tatou atunuu, le tofa loloto, le faaloalo ma le vatapuia i le va o lau Afioga ma sui usufono uma. E fia momoli atu ai le faafetai. E ui lava e le o atoa le malosi o lou soifua, ae le o faatamala ai, e te le o faavaivai ai, o lo o e tu lava i le tulaga na e tauto ai i totonu o le Palemene lenei. Faafetai i lau Afioga i le maua foi o lea o le a e malolo manumalo. E momoli atu le matou faamalo, e momoli atu foi i le agaga o le fiafia, o le a e see atu foi i nisi tulaga o lo o faamoemoe i ai le Atua mo oe. Ia manuia laasaga uma o lou malolo ai, ia faatasi le Atua i fuafuaga uma. E i ai foi le isi tala, e tapuni atu le isi faitotoa, ae tatala mai e le Atua le isi faitotoa. O le tatalo a Satupaitea, o le tulaga lena o la e i ai. Ia manuia tele lou malolo faafetai mo lou sao. Amuia oe ua leva ona e tautua i le Palemene, o lea o le a e malolo i lou lava loto. Faafetai i le Atua, faatasi atu le Atua ia te oe.

Ia o nai isi foi o ou uso a Minisita Honourable Tuitama, Honourable Aeau, Honourable Faasootauloa, lea foi ua silafia e le Maota o le a outou malolo, malolo manumalo. Ia, o le agaga lava lena e tasi. Faamanuia le Atua i fuafuaga ua fuafua i ai i le lumanai, faamalo faafetai mo lo outou sao i le tatou atunuu. Ua sinasina outou ao, ua iloa ai i ina ua leva tele la outou tautua. Faamanuia le Atua ia te outou ma fuafuaga uma o le a outou alo atu i ai. O outou mama na.

Lau Afioga i le Fofoga Fetalai, ua oo mai i le taimi e avatu ai se upu a le sui usufono mo Satupaitea i si o matou itumalo pele o Satupaitea. Ia, o le lauga mulimuli foi lenei a le sui usufono o Satupaitea i lenei Paeaiga. Ia, lou itumalo e Satupaitea, o lea ua sina le galu ma ua ite fanua a lalo, o le tatou faigamalaga i lena 5 tausaga ua faaiuiu, o lea ua siliofe tautai o le Palemene o Samoa, ua sisi taula foi le seuga ma seu i fanua sa o sui usufono o le Maota Fono lenei i Tiafau, i le maea ai o galuega o lenei Paeaiga. Ona ou toe foi atu lea i si ou itumalo ma ou faapea, se ua faamalo folau, faamalo i si o tatou itumalo. Faamalo le tatalo, faamalo le tapuai. Sa outou tuuina mai au ou te alu ou te galue aua se sao o Satupaitea i faiga upufai o Malo, ae sa outou tui mai lava le mulipapaga ma feula mai le mulila. O i ina na maua ai pea e la outou sui usufono ma la outou auauna le lototele, mafanafana o la outou tapuaiga, la outou tatalo leleoa i le ao ma le po. E moni ai le upu a le atunuu, o se faiva e tapuaia e ae ma le manuia. Ou te manatu Satupaitea si ou itumalo,

ua ae ma le manuia le tatou faatamasoaliiga. O lea ou te fia momoli atu ai lau faafetai mai le taele o lou fatu i lau tapuaiga si ou itumalo. E le gata i Satupaitea le itumalo, a o Satupaitea uma foi o lo o alaala i Samoa nei, aemaise foi alo ma fanau a lo tatou itumalo o lo o alaala i fafo, tapuai mai lo tatou itumalo. Ua ala ona tuuvaa ese atu o le sailiga o manuia o nuu, aiga ma Ekalesia. A o le fatu, o latou loto uma o lo o i totonu o le tatou itumalo.

Ou te fia faaleo ai lau faafetai i lau puleto ma lau pule faaaloalo Satupaitea, ua e faaofu au i le ofu tele, ua e faaula lou vaivai i lau faasoa, ua e faapale lou faaleiloga i le pale o le manumalo, ua e sii au ma faanofo i luga o le maa salafa e ala i le tofi faipule o le tatou itumalo i lena 5 tausaga. Satupaitea, faafetai, faafetai. Ua malie mata e vaai, ua malie taliga i faalogo. O upu a le Tusi, “A galo oe ia te au, ia pipii ane lava lou laulaufaiva i lou gutu.”

Ou te faafetai atu i le tapuaiga a feoi o le Talalelei o lo o galulue, tatalo mo si o tatou itumalo, Ekalesia uma o lo o i totonu o Satupaitea. Lau Susuga i le alii Sea Pisopo ma lou faletua i le Ekalesia Metotisi i Vaegā, lau Susuga Taulafo ma le faletua i Pitonuu-tai, lau Susuga Lone ma le faletua i Pitonuu-uta, ia lau Susuga Seloti ma le faletua i Satufia. Susuga i Alii Epikopo o Faleao Siu Faga, faapea Taele Lalomati i Ualota e 2 a Moasula ma lua faletua, Susuga ia Tafai ma le faletua ma le Ekalesia Penetekoso. Susuga ia Toni ma le faletua, o le Assembly of God. Susuga a Soifua Lome ma le faletua i le Ekalesia Asofitu, ia ma le Susuga i le alii Peresetene ia Lalofalā ma le faletua o le Ekalesia Mamona. O Ekalesia uma nei o lo o i totonu o si ou itumalo. O le mea foi lea e manuia ai lou itumalo, e tele auauna a le Atua o lo o tapuaia faiva o si ou itumalo i itu uma lava.

Faafetai mo la outou tapuaiga, faafetai mo la outou faamanuiaga i lou tulai mai e avea ai au ma tofi o Satupaitea i lena 5 tausaga. Sa lagona i le loto le mafanafana i le pai mai o la outou faamanuiaga. Sa ou alofaiva aua se sao o le tatou itumalo. Tau ina ia alofa pea le Atua ma utupupuina la outou tofa faaleagaga aua le galuega a le Atua ua tofofi ai outou tou te galulue ai.

Faafetai foi i le tapuaiga a nai ou tama ma tina matutua i si ou itumalo o lo o faafogafoga mai. Faafetai mo la outou tatalo leleoa ma la outou faamanuiaga tuu mai pea i la outou faipule. A o le a ea se tau i ou te avatu mo oe si ou itumalo? Lei se auro po o se ario e mafai ona ou tau i atu ai la outou faaaloalo, tau o le mea e mafai ona ou avatu o au galuega sa ou galue ai i lena 10 tausaga aua outou. O lou olaga galue i lena 10 tausaga ua mavae, na ou avatu atoa mo oe si ou itumalo. E molimau galuega a le tagata. Afai ua faamalieina oe i se tautua sa mafai ona ou faia, o le viiga lena o le Alii. Afai foi ua le tau ma lou finagalo i se tautua, ia ona ua pau o se mea ua oo i ai lou vaivai. Ou te tatalo i le Atua ina ia foai pea le soifua laulelei i si o tatou itumalo. Ia foai pea e le Atua le tofa faatupu ma le tofa faatamalii, o le tofa, o le susuga, o le afioga, ma le faautautaga e pulea ai si o tatou itumalo. Ia avea pea Satupaitea ma fetu pupula i totonu o Samoa ona o ana pulega tonu ma faiganuu lelei. I se taumafaiga mo atinae a si o tatou itumalo, ia sa

faamuamua lava ia te au atinae e faamanuiaina ai le itumalo atoa e pei ona i ai le tatou falemai, lea sa matou galulue ai ma isi ou uso a faipule. Lea ua ea le tatou pologa i le tatou tausavali i Tuasivi, 30 pe a tausaga. E tele foi ni soifua ua fano i le auala ona e 2 itula e alu ai le taavale ma toe foi mai. O le a le mea lea ua i ai? O lea ua i ai le tatou falemai i totonu o Satupaitea, ua i ai ma le fomai, 24 itula, ua le o toe lamatia le soifua o le tatou itumalo, o lea ua i ai le auaunaga aupito sili ona lelei. Ia, o atinae na mo le itumalo atoa. Taumafai foi la outou sui usufono i ni auala galue, aemaise le auala galue i Pitonuu, leaga o i ina e service mai ai le vaitaumafa o si o tatou itumalo, o mea silisili ona taua.

Ia, o le auala galue o Satufia. O si na nuu sa leai se auala na faaleagaina lava e le vaitafe, ia, ona tuu ai lava lea faapena. O mea na sa faamuamua i ai le agaga ma le loto, e le i faapea na fai faapito i se pitonuu. O lena ua i ai le tatou malae taalo e atiae ai tupulaga taaalo o si o tatou atunuu, lo tatou itumalo. Faapea ea na o isi nuu e fai le Manu Samoa? O lau tala lava na fa ii totonu o le Maota leni i lau lauga muamua, seiloga lava e taunuu mai sui o Satupaitea i totonu o le Manu Samoa ona tatou toe siamupini lea. E tumau pea le agaga lena ia te au. Ia alo ane laia e faaaoga le tatou malae lena ua uma foi ona fausia faleletaua e mafai ai ona o atu loa Iuni Lakapi e faatino taaloga i o i le tatou malae, o le malae ua fua lava o le malae faava-o-Malo. O lena foi ua tu le hall a le tatou faleaoga tulagalua, a o lea ua galue lo outou sui usufono aua le fausiaina o le tatou faleaoga fou. O lena na alu atu le asiasiga a Iapani i le vaiaso na tea nei. Ia, o le tala mai a le Matagaluega o le LTA, toe o ni nai vaiaso ona oo atu lea o le galuega i le auala galue o si o tatou pitonuu lea i Vaegā, ona tofu ai lea o tatou pitonuu ma auala galue, ia ona alo ane loa lea e galueaiina o tatou tuamaota.

E i ai nisi atinae foi sa naunau i ai, ae paga lea, o le faasoa a le tatou Malo e utiuti, ma e le tele se keke pei ona saunao i ai le Palemia, ae toatele tatou ia ua mananao i le keke. Ma ua moni ai le upu, e le i fausia Roma i se aso e tasi. Ma e alu aso, sau foi aso ma ona galuega e faatino ai. O le mea moni, e faataunuu lava nei fuafuaga uma, faataunuu.

O tatou taligalu ua leva ona ave le tatou talosaga. Ia, o lo o taatia ai pea. O fuafuaga foi sa i ai, ua le o faatasi foi le futia ma le umele i alagatupe sa maua mai i Faalapotopotoga mai fafo, ua le o toe maua, lea ua taatia ai le tatou atinae lena, ae tulituli pea, ae tulituli pea.

I le alo atu si ou itumalo i le faiga filifiliga, ia pau lava le tala a lo outou sui usufono, tuu i le Atua lo tatou faamoemoe, o i ina e maua mai ai le faaiuga moni ma le amiotonu. Afai lava e toe finagalo le tatou itumalo ou te galue mo Satupaitea, o lo o lava pea lou malosi ma le naunautaiga ou te tautua ai i le isi 5 tausaga.

Ia si ou itumalo e, e leai lava se tagata e atoatoa. Afai ua i ai se gaioioiga, o se upu ua lafo ua le tautamalii i la outou faafofoga, ou te tatalo atu, faamagalalo mai le auauna. E poto lava le tautai ae sese lava lana atu i ama.

Lafo ia i nuu le aina ni sese ma ni aleu o Lautafi i lo tatou va feagai ai. Faamagalo ma faagalo se sese o la outou auauna.

Lau Afioga i le Fofoga Fetalai, o lau faafetai mulimuli, o lau faafetai lea i le Atua, ona o Lona alofa fuatia ifo na Ia foai mai ai le ola, le malosi ma le tomai sa mafai ai ona ou faatino ou tiute mo Samoa, aemaise si ou itumalo i lena 5 tausaga. Ia viia pea le Atua ma ia faamanuina Lona Suafa Paia. Aua ne i i a te i matou le Alii e, a ia foi pea le viiga ia te Oe, nei ma aso uma o lo matou ola.

Ia manuia le alo atu o Samoa i lana faiga filifiliga, ia faatasi mai le Agaga o le Atua e maua ai e Samoa le filemu i aso uma lava. Soifua ma ia manuia.

Na faaalua le agaga fiafia o le Palemene i le patipati o latou aao i le maea ai o le saunoaga a le Minisita mo Pisinisi, Alamanuia ma Leipa.

FOFOGA FETALAI: Malo faafetai, malo saunoa ua malo foi malele. Ua faafofoga le itumalo ua e faataoto foi tia o le tautiaga, aua le faafofoga tapuai mai a le itumalo se i vaeatu Samoa. Le itumalo e, manatua Afia i si ona vao e pei ona saunoa atu ma tatalo atu le Afioga i le Minisita. Ia, amuia foi lo outou itumalo o lo o faapena ona maualuga le faaeaea a le itumalo aua le tulai mai o si outou sui usufono. Ia, o faamanuiaga e faapena ona filifili e le Atua o tatou tagata i lea tofi ma lea tofi, ae faalagolago e auala mai i le faiga filifiliga a le atunuu. Malo galulue. Faafetai, e le tau laeia le saunoaga i lau Afioga i le sui usufono mamalu.

Ia, ma o lea ua oo mai le faasologa i le Afioga i le... Ia, ou te muai tapa muamua lau Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia): Lau Afioga i le Fofoga Fetalai, faamalo i le saunoaga a le Afioga i le Minisita. Sa ou fia tulai i le aso ananafi ona e i ai mataupu e 2 matuia na aumai e le sui usufono mo Salega Sasae, lea foi ua le usu mai i lenei taeao. O au nei a lauga loa se isi o le toa-fa lea, e matua ola uma au mea pueleo ma au antenna ma ou faalogo i vailaina, leaga o lauga uma e sau i totonu o le Maota lenei e afifi mai ai mea mataga ae faamuamua mai upu taufaaleole ma taufaasee. E 2 la mataupu sa laga i le aso ananafi. Sa ou manatu e lelei ona se i maea lelei le saunoaga a le sui usufono ona ou talanoa atu ai lea.

O le mataupu muamua, sioki moa. Ma le mataupu lona 2, e faasino lea i araisa otaota, o araisa e manua o lo o afifi mai ai foi se agaga leaga. O lea la sa ou le vave tali atu ananafi, sa ou faalogologo se i aumai uma mea palapala ia e i le loto, ona ou tulai atu lea e faasao. E i ai foi se taimi mulimuli i le tau faaiiuga ona ua ou manatu e faatu se lafo e faatatau i faasalalauga uma lava lea ua uma ona faamaumau, faasalalauga e fai e latou nei ua tuua le Fono ae o e ave le talaiga, talaiga leaga, talaiga faatupu leaga, faasese, taufaasese,

ma mea leaga uma e faasese ai le tatou atunuu. Ona e i ai le fesili. E tuufau ea ituaiga uiga faapea, e tuufau? Ae tulai mai ai se atunuu ua amata ona agai mafaufauga, po o le a ea le Palemene lenei? O se Palemene ea o Taitai e fai ni uiga faapea, o le ave o ni upu taufaasese? O lea lava ou te tautala soo i ai i le mea lea. Afai ua silasila le fia selau afe o tagata Samoa ma le Maota nei ma latou uma sa i ai i le taeao lea o faatauto i i i le Tusi Paia, se isi o sui usufono o i latou ia ua taua o Taitai, ma tau ai le Suafa o le Atua ma molimauina e tulaga tofi mamalu uma o le atunuu lenei ma le atunuu atoa? O le a la se mea e i tua atu e le mafai ai ona oooo i tulaga o le taufaaleaga ma le fai o ni tala le faamaonia?

O le ala lea lau Afioga ua ou tulai atu ai e faasao mea ia, ma o le taua lena o le tatou Tulafono Tumau, i le fiafia o tagata e o ese atu ma le Maota lenei e o e fai talaiga i fafo, fafo atu o le Maota, aua foi e saoloto ai. I am free. O upu na lea sa tautino i le Maota lenei. We are free. Saoloto i le a? Saoloto i le taumamaina o le Maota lenei, o lo o saofafai ai faatumutumuga o itumalo ma le atunuu, amata atu i luga ona avatu ni uiga paaa, ni uiga o ni tagata faatupu vevesi, a o lea e tau o Taitai o Samoa. Sui, sui le Malo. Sui i le a? Uiga ia, uiga ia o le ave o ni uiga sese taufaaleaga. O mataupu ia e 2 lau Afioga i le Fofoga Fetalai, ua sioki moa. Tulou lava le faafogafoga mai a Samoa. O le vaai a le Malo, e le tatau, le tatau, le tatau ona le maua se oloa eseese i Samoa nei. E le tatau. Aisea? Leaga foi o lea e lava teugatupe a le Malo e oka mai ai oloa. O lea e lava. O le ki atoa lena o le i ai pea o oloa i Samoa nei, aua ne i toe tupu se mala e feagai ma le atunuu lenei i tua atu o le Faigamalo lenei. Aua ne i toe tupu. Aua ne i toe tupu. Ia lava teugatupe faaagaaga mo le tusia o oloa e moomia e le tatou atunuu. Afai la o lea e lava, o le a la le mafuaaga pe afai e sioki? E le oka e le Malo ni moa. O le galuega lena lau Afioga a le aufaipisinisi. E fua e latou i le fegasoloai mai o vaa, mai i lea taimi i lea taimi, ona fua ai lea o latou oloa e tatau ona sau. E tilotilo i le faagasologa o vaa mai Amerika, o vaa e sau mai Niu Sila, o vaa e sau mai Iapani, ma isi atunuu, e aumai ai ituaiga oloa eseese. Ona fua lea e latou i le faatau lea e alu pea, so o se ituaiga oloa, ona faapena lea ona vaevae e le faioloa le oka e tatau ona sau i lea vaa ma lea vaa. E pau lava la le mea, e ono faaletonu ai, e le lava teugatupe a le Malo e oka mai ai oloa. O lea la ua fofu atoa e le Malo le mea lena, e pei ona saunoa ia nisi o sui usufono, e ave ai le faafetai. O le faafetai ia ai? O le faafetai i le pulega, o lea lala o le Malo i le tamaitai Kovana, e faaaogaina o le faautautaga tatau, faasoosoa tatau. E leai lava se mea o afaina ai, ae faatoa pau lava le mea e afaina ai. 1. E faaletonu ai, ua sasi le faioloa i le faatulagaga o latou oka, pe faapea ua televave ia le faaalu, aemaise lava pe a tele faalavelave, ae ua le tutusa ua ova mamao atu ma le tulaga masani.

O le isi mafuaaga ona o le tulaga lea ua tulai mai i le taimi lenei, ua tau faasoosoa mai e kamupani vaa foi latou le sau o latou vaa. E i ai le taimi na aumai ai le tusi ia te au ma le Kapeneta ma le tatou komiti lea latou te vaaia

ma le totoa le faagasolo mai o vaa mai fafo. Ona sau ai lea o le tusi e faapea, ua taofia e Fiti ia le isi vaa. Ae po o le a se faiga a le Malo, e faapena foi i vaa e oso mai Tutuila, ae o le a se faiga a le Malo, a le faia se faiga i i, i le vaa lea. O lea ou te manatu o le amataga o le masina lenei o Fepuari, e ono sioki ia le vaa e aumai ai moa. Ae faatoa sau le isi vaa i le aso 25 o Fepuari i le taimi lena, e tusa ma le 3 vaiaso talu ai. Na faia ai le faiga faapitoa e le komiti, na matua sui ai le latou fuafuaga, o le a sau le vaa, a o le a faataoto foi ma a latou taiala ina ia aua, aua, aua, ne i aafia se isi pe a fai o le tatou atunuu, pe a fai o sau le vaa lea ma sau ai se isi o lo o gasegase o lo o aumai ai se siama o le Koviti-19.

Lau Afioga i le Fofoga Fetalai, o faiga na fetuutuunai, e taunuu le vaa toe alu, e leai lava ma se mea na afaina ai. Ona faaauau pea le supply o moa, ae sa tau i ai sina popolega pe a le sau le vaa lea. E pau lava lena o le taimi na ou faalogo ai, i le mea lea ua tau faaletonu le moa, le supply o moa, ona ua faaletonu fuafuaga a le au faioloa ma le taimi ina o le soloai mai o vaa lau oloa. O le vaega lona lua, lau Afioga i le Fofoga Fetalai, o alaisa. Ua fai mai ua otaota alaisa, fai mai ua otaota alaisa. Lau Afioga i le Fofoga Fetalai, o tatou uma lava nei e faatau alaisa. O le a la le mea ua otaota ai a na ia alaisa, a o lea tatou te faatau alaisa lava, e leai ni alaisa o otaota. O le tele o le mea o le taufaasese ma le tau faaleaga, e faaleaga ai lea vaega o le atunuu, le au faioloa. Ae lilifa foi ia i latou o tamalii o Saina o lo o nonofo i teine Samoa, ma fai a latou gaioioiga faa-faioloa. O le toatele ia o tagata Samoa, e ova i le 1,000, o lea o lo o faafaigaluega, e nai pisinisi ia mai fafo.

O le ala foi lena lau Afioga i le Fofoga Fetalai, o lea e taumafai ai le Malo e faaulufale mai pisinisi eseese, e omai ina ia tele ai ni galuega mo a tatou fanau. Ae o le a le mea lea e tupu nei? A sau lava le faipisinisi o le palagi e sau mai Niu Sila po o Ausetalia, pe sau mai Peretania, e leai lava se isi e pisa. Ae vaaia loa se Saina, oi se pei o le a le taufaaleaga. O le mea o le taufaaleaga tagata, taufaaleaga tagata. Lau Afioga i le Fofoga Fetalai, e le o ni aga ia e masani ai, e tatau ona fai e ni taitai o se Malo, o lo o faavae i le Atua. O le isi itu lau Afioga i le Fofoga Fetalai, o le tele ia o galuega ia o le faiga o fale o aiga. E talu ai le faaauau pea o tatou tagata e o i fafo, i galuega ia faavaitaimi. Ua matua sese atoa ai, ia le vaai mamao a i latou o fale laupapa. O le ala lena e pei ona ou fai atu, e leai se mea e tatau ai ona sioki ni oloa e aumai, o lea e lava le tupe. Aua o le ki atoa lena, o le sologa lelei o fefaatauaiga o le lava o tatou teugatupe e fuafua mo fefaatauaiga. Ae mafua ona alualu faaletonu, ona ua faaletonu le vaai mamao a i latou o le au faioloa. Ae ala ona aumai mea ia i totonu o le Palemene e faatupu ai le lotoleaga. Lau Afioga i le Fofoga Fetalai, o le mea lava lea o le loto, aemaise lava le taimi lenei o faiga palota. O le anoano o mau mea leaga lea e pue atu e le Malo ma faamaumau. E i ai le taimi e liliu i ai le Malo i le itu lea, leaga e le tatau ona tuufau, tuufau ituaiga uiga leaga faapenei. E tutupu mai ai le vevesi o le atunuu i le lumanai. Ma o lea lava e amioleaga, e le mafai ona tuua le

amioleaga, a fai o lea e aliali le amioleaga i totonu o le Maota lenei. O fafo atu o le Maota, e leai se puipuiga saoloto i le fai o le amioleaga.

Lau Afioga i le Fofoga Fetalai, o le ala lea ou te tulai atu ai, e ave le faafetai i le Minisita, ua avea foi lana saunoaga, ua sao mai ai ma manatu taufaaleaga ia, ua afua ai ona ou tulai atu e faasao. Ae aoga foi le faasao, e malamalama tele ai lo tatou atunuu, lea e alu atu ai talaiga ia, talaiga ia e taitaisese ai le tofa ma le faautaga. Lau Afioga i le Fofoga Fetalai, o lau faaopoopo atu lea i le saunoaga. Sa ou manao se i uma lelei ona ou tulai atu ai lea i le manino, ma avatu se taofi e fesoasoani i le tatou felafolafoaiga o lo o fai nei.

FOFOGA FETALAI: Ia malo faafetai. E i ai se mea, sui o le Aiga i le Tai e fia...

Susuga Mulipola Leiataua Laki (Aiga i le Tai): Lau Afioga i le Fofoga Fetalai, o si vaega foi e pei ona saunoa le Afioga i le Taitai o le Malo, sa le fia faalavelaveina foi le saunoaga matagofie i le Afioga a le Minisita i le aso ananafi. Ae sa mafaufau lava ma fuafua seia maea le saunoaga a lana Afioga.

I lenei taeao, o le ala lea o le tatalo, o tulaga i le vaega e pei ona saunoa le Afioga i le Palemia, ona o saunoaga le faavaea e pei ona lafo i le Maota i le aso ananafi. Ma ua fesootai lelei lava ma tulaga e pei ona faatino ai le road show ananafi i lou itumalo. Lau Afioga, e mamafa i lou loto talu mai anapo, o lea e faafofoga le Atua, ou te le i moe i le po atoa anapo. Aisea? Na ou matamata i le road show i tai i lou motu. Na ou toe matamata le road show i uta i Satuimalufilufi. Ma faamaumau ia, ua vaai mai lau Afioga i le tele o itulau, sa tau faamaumau ai. Ua tumu lou itumalo i mea leaga, tumu lou itumalo i mea leaga ma tuuaiga taufaasese, tau faavalea talofa. Na oo lava ina penapena ai ma au e tagata nei le mafaufau, tulou lava le gagana. Lau Afioga i le Fofoga Fetalai, e matua lagolago le saunoaga a le Palemia, ae talofa, e oo lava i lana Afioga, ua matua faifai lava nei tagata. Na matua faifai lava ua leai se tuaoi. O fea le vatapuia o lea e o mai nei i le Maota, fai mai, faifai malu outou faiva, faifai malu o tatou faiva. O fea? E leai se nofo lelei o le atunuu e maua, alu anapo e le moe, tuu vili mai lou itumalo ma lou nuu.

FOFOGA FETALAI: O ai lea e faasino i ai lau saunoaga.

Susuga Mulipola Leiataua Laki: Lau Afioga o le Vaega Faaupufai a le FAST, le Afioga ia Laauli ma le Vaega Faaupufai. E matautia ia lafoga, a ou fua i ai, ou te nofo fua i le Nofoa lenei, nofo fua i le Nofoa lenei. Ae ou te ofo, o la e o atu, o la e lavelavea atu i galuega la e..., e o atu o la e fau le uafu, uma le garden toilet e 5 potu, o la ua uma le fale faatali pasese. O la e fau le uafu, ua maea lou vai i tai, o la e tau fix le vaega e pei ona motusia i le vai i le taimi nei. Ae matautia folafolaga ia e fai. Lau Afioga i le Fofoga

Fetalai, e le tuumamaina. E leaga e oo lava i le Maota lenei, e matua faifai lava i Fono ia e fai, e fai fua Fono nei e fai. O le ala lea lau Afioga e le nofonofa ai.

Ae momoli lava lou agaga faafetai i le susuga i le toeaina, ma le susuga ia Maluelue, i le upu folafola i le aso ananafi. E to lou pulou i le faifeau EFKS, sa saunia le sauniga, le upu tuusao o le agaga fevaevaeai, ma le agaga fetuiai e tataua ona aveese. A faafefea ona o mai e taitai le Malo pe a fai e o ma folafola atu na o mea leaga e tautatala i ai. Lau Afioga i le Fofoga Fetalai, e le folo mama e le sui lenei o le Aiga i le Tai. E leaga e pei e faavalevalea le sui usufono i le silasila, ae le i soona sau le sui lenei i totonu o le Maota. E tulaga ese le tulai mai o le sui lenei i le palota lea na uma atu nei, talu ona faavae le palota a le Aiga i le Tai.

Ae ua a nei, ua matua tuumauualaloina ma taufaatauvaaina le Nofoa o le Aiga i le Tai. O lea ua o faaoloataua, le sui ua tataua ona aumai le sui lea na aumai i Savaii avatu i o i le Aiga i le Tai. O le a le mea na le lagolago ai i lau lauga faafia i le Maota lenei se sui mo le Aiga i le Tai. O lea ua ou faataatia le alafua, aumai Satui i totonu, se i tuu i luga le numera o le Aiga i le Tai, ma le... lea e tai lua i le isi Paeaiga. E le i soona nofo le sui lea i le Nofoa lenei, ae ua faaoloataua e nei tagata. Lau Afioga i le Fofoga Fetalai, faamalulu atu i lau Afioga, le Palemia, le Kapeneta ma le faafofoga a Samoa. E faamalulu atu, e alu le po e le maua se moe. Sa tuu atu i le Atua e fesoasoani mai i le aso lenei, leaga e le taugofie, e le taugofie. Faamalulu atu i lau Afioga, a pao papa se faamatalaga, toe foi mai le vaivai o lenei itumalo. O le tala a le tusi, e le pei o se tui le matagi. Ia agalelei le Atua i le Fonousu a le atunuu.

FOFOGA FETALAI: Ona o lea o le a e toe saunoa faa-lua, ia malie le sui. O lea ua ou fesoasoani atu, o lea ua ou tautaualemau le saunoaga. Ia faafetai.

Susuga Laauli Polataivao Leuatea (Gagaifomauga Nu 3): Lau Afioga i le Fofoga Fetalai, e fia maua lava se avanoa faamolemole. O lea lava ua tatala lava le avanoa e fai mai foi tuleiga ma saunoaga i lenei itu, faamolemole. Lau Afioga Toleafoa e fia fai sa matou tala.

FOFOGA FETALAI: Ona o lea sa taua lena itu o le Maota, o le itu lea o lea sa ou popole ai Aiga i le Tai, a o lea ua aumai lou finagalo. Na ou tuu atu ne i te i ua oso sou mai maliu, tulou, sala le gagana i le mamafa o ia mea e te fealuai ma oe. O tatou uma e faapena a o le onosai lava e fai ai. Ae leaga o lea na taua le Vaega Faaupufai, ia Laauli ou te tapa lau Afioga, ia mama le sausau, tainane foi o le feagaiga a le atunuu lea sa saunoa, e faapena lava uiga o le tamaitai.

Susuga Hon Laauli Polataivao Leuatea: Lau Afioga i le Fofoga Fetalai, i lenei foi taeao fou ua tatou alafai mai i faguga lelei, i le alofa ma le agalelei o le Atua, tapuaiga a Samoa aemaise foi lenei Palemene. E faamalulu atu Samoa i lau faafofoga mai, i lenei foi aso, ua ese foi vaasaga o lenei taeao. Ae o lea foi ua ese taiga ua oo i ai le tatou Fonotaga.

Lau Afioga, o la e molimau le itumalo sa matou i ai ananafi. E le o ni a matou upu ia upu ia na mafua ai ona tau le suafa o le sui o le latou itumalo. O le fesili na aumai e uiga i le matou faamalamalamaga i le uiga i le mea lenei. O le soligatulafono ma tatou tulafono faavae. O i na ave ai le matou tali, e manino ma malamalama. O le a le mea e mafai ona fai i tagata nei e saofafai i le Maota ae ua soli le tulafono? O i ina na ave i ai le matou faamalamalamaga. Ona o luga o aiaiga o le matou savali, o le faapulapula o faiga faavae a lenei Vaega Faaupufai, e faamalamalama ai taualumaga o faiga palota. Ae leai se agaga lau Afioga o matou o e faaleaga, e faa-faaoloataua le itumalo. E leai, Toleafoa, po o le a le matagia o le aso, na matou asa le vasa lea, ona o le pine faamau, e fia feiloai ma le itumalo. Matou te le i o atu foi fai se faaoloataua. Na aumai le feau a le faifeau, avatu le matou tali, fetau fola e pei o ia upu. Ae o le mea lea e saunoa i ai le sui, Mulipola, o lau soligatulafono lea na oo ai le mataupu i le mea lea. Ia e finagalo malie, e leai se matou tala, matou o atu faapea e faaleaga oe. O le upu la na fai, ua soli le tulafono o le Maota. O i na ala ai ona fai le matou upu. O le mea foi lea e saunoa i ai le Afioga i le Palemia, Tuilaepa, faamalulu atu. E pau lava le matou upu na faamalamalama o le le mafaufau i le atunuu. O upu ia e lafo ia Samoa, lea matou te faaoioi ma faalalolalo i ai. O upu ia e te lafo ia Samoa, e matou te faaoioi i ai. Ae matou te le o faia se mea e vevesi ai le atunuu. O lea lava e faamalamalama le matou anavatau, e fesili ai Samoa o le mea lea e fai, pe a faapea e tau lo latou faamoemoe mo matou. Ae o lea lava e lafo i lau faatautoga na fai, e le i lava ea lea.

FOFOGA FETALAI: Se i tulai mai le Palemia, malie Laauli...

Susuga Hon Tuilaepa Auelua Fatialofa Lupesoliai Lolofietele Neioti Galumalemana Dr. Sailele Malielegaoi: Se e le o matou o ni vale, lau Afioga i le Fofoga Fetalai. O lea matou te faitau uma i au upu ia na fai, o lea matou te faitau uma ai. O le a le mea ua outou faapena ai? Ua outou omai i itumalo o faipule e faalotoleaga. O le a le mea tou te le o ai outou i outou itumalo, outou ia e toa-fa. O lea le mea tou te le o ai outou i o outou itumalo e faamalamalama i o outou itumalo. O lea e i ai faipule o itumalo, e fai e latou faamalamalamaga, ae o lo outou o atu fai ni upu, ni upu matua masoa tele. Aua e te faalata, oe lea sa e tulai mai nei, sui o Gagaifomauga Nu 3. Oi... se ua maona le atunuu lenei i au talapepelo. Ua maona, aua e te... e te le faavalea le Maota lenei. E i ai le upu e mafai ona e faavalea na i tagata toaitiiti. Ae le mafai ona e faavalea le atunuu atoa. O a nisi upu e te saunoa

i ai? O a nisi upu? O lea ua silasila Samoa i le mea na e faia i totonu o le Maota lenei. O so o se upu e te toe pau mai i lou fofoga, ua malamalama le atunuu, ua malamalama lelei. O le ala foi lena o lea tou te o ai e feoi i tua, e leaga e leai se avanoa ia i matou e faasao. O le mea foi lena...se i uma atu, o lena e te lua talanoa. Se i uma atu lau faasaoga, o le a se mea e te saunoa i ai, o upu uma ia na e tulai mai ai nei, e leai se mea e sao o na mea uma. E leaga o lea matou te tilotilo i ai ia outou faasalalauga...

Susuga Hon Laauli Polataivao Leuatea: Lau Afioga i le Fofoga Fetalai, malie lou finagalo, o lea e faafofoga le atunuu. Tuilaepa o lou lava lena manatu, o lou lava lena finagalo. E leaga o lea e te pule saoloto i le Maota. O le a le matou avanoa o fai, o lea e te saisaia matou.

Susuga Hon Tuilaepa Auelua Fatialofa Lupesoliai Lolofietele Neioti Galumalemana Dr. Sailele Malielegaoi: Lau Afioga i le Fofoga Fetalai, faamolemole pe ua e faataga ia...

FOFOGA FETALAI: Ia malie Laauli se i maea mai le faauilavea ma le faasaoga a le Palemia.

Susuga Hon Tuilaepa Auelua Fatialofa Lupesoliai Lolofietele Neioti Galumalemana Dr. Sailele Malielegaoi: Lau Afioga i le Fofoga Fetalai, o lea foi ua toe lafo mai foi lea upu. E pule saoloto i le Maota. E pei e aliali mai ai, o se upu ua faaleaga ai le Nofoa. Ua e vaai i iuga a le Palemene, o iuga ua uma ona fai, a o lenei e faaleaga faaleaga, faaleaga iuga ua uma ona fai, e pasia ai Tulafono. A o le a le mea lea e fai? O le o faaleaga le Tulafono ua uma ona pasia, ma faaali atu i le atunuu, le mea e ala ai ona tetee. Ae o mea ua uma ona pasia i totonu o le Palemene lenei. O le mea lena o lea se i ai se taimi ona ou laa loa lea i le tulaga lea. O faaiuga ua uma ona fai i totonu o le Palemene, ae outou o talaga, talaga, ma tau mamaina ai le mamalu o le Palemene lenei. Lau Afioga i le Fofoga Fetalai, o le a lava le mea e saunoa i ai le sui lea, e leai nisi mea i tua atu o mea ua vaaia. O mea ua vaaia i totonu o le Maota lenei, o a upu e te saunoa i ai, se ua toe lava o se pili ma se moo e le silafia, ia uiga o le sui lea e tulai mai.

FOFOGA FETALAI: Ia malo faafetai. Ua i ai le manatu...

Susuga Hon Laauli Polataivao Leuatea: Lau Afioga. O le a le toe sili sou leo, Toleafoa, o le a le toe faasilia sou leo. Tuilaepa, pe te le talitonu ia te au, ou te le popole. I dont worry. E pau lava le mea ou te popole ai o Samoa. Ae o le ta va, ua ou le toe talitonuina foi oe, thats why I walked out...

Susuga Hon Tuilaepa Auelua Fatialofa Lupesoliai Lolofietele Neioti Galumalemana Dr. Sailele Malielegaoi: Lau Afioga i le Fofoga Fetalai, o se mea e fia faasao...

Susuga Hon Laauli Polataivao Leuatea: Ae ou te le popole pe e te popole pe te toe talitonu ia te au, aua ou te le toe talitonu foi ia te oe. My trust is gone.

FOFOGA FETALAI: Ia malie ia, se i onosai mai.

Susuga Hon Tuilaepa Auelua Fatialofa Lupesoliai Lolofietele Neioti Galumalemana Dr. Sailele Malielegaoi: E pau lava le mea e fia faasao lau Afioga, o le saunoa mai o le sui e le talitonu. E leai lava ma se isi o le Maota lenei o toe talitonu ia te oe. E le gata la i le Maota lenei, a o Samoa atoa. E leaga foi e tilotilo mai i i, a o la e oo mai nei lava. E oo lava i au tusi ia e aumai ia te au, o la e saina lava, Laauliolemalietoa. Tuu lou fia Malietoa, e le o oe o se Malietoa.

Susuga Hon Laauli Polataivao Leuatea: O lea la ua maua nei le mea e tiga ai le finagalo... O lea ua ou maua le mea e tiga ai le finagalo o le Palemia. Tuilaepa, o lou tino atoa o le toto o Malietoa. Fua lou va ta te va ai, po o fea lou gafa i le Malietoa.

FOFOGA FETALAI: Ia lafo ia i le atunuu i la latou tapuaiga.

Susuga Hon Laauli Polataivao Leuatea: Ia fuafua o la e faafogoga le atunuu. O la e faafogafoga lou itumalo, o lou faalupega, o le Laaulialemalietoa. A ta o e fofola le gafa a le Malietoa, ou te le iloa po o fea e te pipii i ai.

Susuga Hon Tuilaepa Auelua Fatialofa Lupesoliai Lolofietele Neioti Galumalemana Dr. Sailele Malielegaoi: Lau Afioga i le Fofoga Fetalai, e na o le pau lava lea o si mea. O lea ua ou faafetai i lenei taeao, o le mea o le tamai moa na ufiufi, o lea ua ioio ae, ua ioio ae. Talofa se ia te oe, talofa ia te oe, ua matua e faamaualuga tele ma e fia maualuga.

Susuga Mulipola Leiataua Laki: Si vaega laititi lea lau Afioga i le Fofoga Fetalai.

FOFOGA FETALAI: Ua i ai le manatu, malie le sui usufono...

Susuga Hon Laauli Polataivao Leuatea: Lau Afioga i le Fofoga Fetalai, ua uma. O le a taatia upu ia o le a... faasino le mea e nofo ai le tagata... O le

a taatia i i, o le a taatia le vavaloloa o Samoa, leaga o le vaofelefele... se i o ta o i Lepa faasino lea o le mea e te nofo ai. (Aua le tape sooa lau mic).

Susuga Hon Tuilaepa Auelua Fatialofa Lupesoliai Lolofietele Neioti Galumalemana Dr. Sailele Malielegaoui: Lau Afioga i le Fofoga Fetalai, a ta o i Lepa, e te iloa lelei lava le mea e fai. E te iloa lelei lava le mea e fai. E te faalogo i le Fatialofa ma Auelua. Ua matua e fiatagata tele.

FOFOGA FETALAI: O lea o le a ulu tafega, ae manatu e... Laauli...

Susuga Hon Laauli Polataivao Leuatea: Tuilaepa, vaai lou gafa, vaai le gafa, na ala ona e papai i mea ia o lou Palemia. O la e manino ma malamalama o le gafa o le Auelua ma le Fatialofa. Fesili. Fesili.

FOFOGA FETALAI: Ua ou manatu, e a ulu tafeaga ae selefutia Vaisigano i le faafofoga mai a le atunuu. Malie ia, Laauli, malie ia... Mulipola, se ua ou manatu se malie ia. Mulipola... Mulipola... Laauli... malie ia.

Susuga Mulipola Leiataua Laki: O le a tele foi le lē mafaufau sole... fai ea ma se ava. E tele mea e te alu folafola ae fai mai e leai sau tala e sii i le Palemia. Ia tatou faaaloalo uma i le tamaloa le la.

Susuga Hon Laauli Polataivao Leuatea: Uso faatoa e faaaloalo ananafi... faatoa e sau ananafi...

Susuga Mulipola Leiataua Laki: Ua leva ona e nofo i le Maota ae e te faavalevalea.

FOFOGA FETALAI: Malie ia, Aiga i le Tai. Se e faapena, se malie... malie ia sui mamalu, leaga o lea o le a pei le tatou fonon o se fonon... o la e fia faafofoga mai Samoa. Ae na tuu atu le avanoa, ona o le manatu se i faailo mai ia faauilavea, po o fea tonu le mea o lo o agai i ai. Ae o lea e tulai mai le sui o Manono, e pei o se lagona faapena, ona o lea ua safē, i le saunoaga a le Palemia, ia lafoga. O lea foi ua ou tapa e aumai faamaumauga o saunoaga a sui mamalu i le aso ananafi. O lea e maua lelei ai ia le tulaga lea sa saunoa i ai le Afioga ia Olo. Na tuuaina ai i latou o lo o faapena ona tali mai i le tatou Fonotaga. O le au faipisinisi ma le au faioloa ua tuuaina i le tulaga faapea. O lo o siitia le tulaga o tau o oloa pe a tuai mai vaa. E le gata i lea, o le le 100% o le quality o taga alaisa ma taga suka, o lea tatou te tau fai faaaoaga uma na mea, e leai se mea o mafai ona faamaonia. O le mea lea sa tuu atu ai le avanoa po o se mea faapena e tulai mai le sui o le Aiga i le Tai. Ae peitai ua avea lea avanoa ua tuu atu ma mea ua faailo mai ai lona

faanoanoa i le tulaga e pei ona i ai foi se asiasiga i le FAST i lona itumalo. E faapena se lagona, o tatou e onosai onosai lava, ae i ai lava le taimi e ova atu ai i tua, aua e le o tatou ni agelu. E i ai lava le taimi e see ese ai i tatou ma le malosi o le fesoasoani mai o le mana o le Alii, ina ia faapena ona tatou maua le agaga onosai ma le faapalepale. Ae ui i lea, o le mea sili o lea ua faafofoga mai Samoa. Ia alolofa o a mea i totonu o le Palemene, ia gata ai lava i totonu o le Palemene, ona faapea lea o le taofi...o lea ua ou faamuta Laauli...

Susuga Hon Laauli Polataivao Leuatea: Ia faamalulu atu lau Afioga i le Fofoga Fetalai, i se upu ua laavale. E faatoese atu ma faamaualalo atu i lenei taeao. E pau lava lea o le faafofoga a Samoa, e le o i ai ni uiga faapea o matou faia. E faamalulu atu i lau Afioga i le Fofoga Fetalai, o a foi ni upu ua felavasai i lenei aso, ia faamagalo mai. Ia manuia taualumaga o le tatou Fono i lenei aso.

Susuga Hon Tuilaepa Auelua Fatialofa Lupesoliai Lolofietele Neioti Galumalemana Dr. Sailele Malielegaoui: Lau Afioga i le Fofoga Fetalai, o le mataupu lea sa ou tulai atu ai, o se mataupu e ogaoga i le faafogafoga mai a lo tatou atunuu. E faatatau i uiga ia o le okaina o oloa. Ae ala ona tatou agai i i, o le faauilavea a le sui o Gagaifomauga Nu 3. E i ai le upu foi lele, e togia lava le moa o le taafale. Ae o lea sa ou tulai atu e faamalamalama le itu lea, a o lea foi la ua agai ai ina tulai mai le sui o Manono. I lau lava faamasinoga, e faapitoaugafa si au faasaoga. E leaga e ogaoga, e ogaoga i le fofoga taumafa o si o tatou atunuu. A o le faauilavea la lea, o lea ua mafua ai ona sipaka, sipaka lo tatou taeao. Ae ia te au ia, e leai lava se mea o tupu. Ona o le uso foi ua le o onosai, a o lea foi ua ou faamagalo i ai. Lau Afioga i le Fofoga Fetalai, ou te faamalulu atu foi i lau Afioga, leaga e tataua ona tau solomua au lou onosai. O au foi o le tagata e le o au o se agelu. O le ala lena na ala ai ona ou taumafai atu e faasao. O mea ia ou te faasaoa, e na o le pau lava le agaga, o le faamanino ina ia malamalama mai lo tatou atunuu o faafogafoga mai. E leaga matou te le o i ai, ia latou fonotaga ia e fai, a o lea matou te maua uma lava, ia faasalalauga. A mea foi o outou o fai a outou fono ma faasalalau mai fua. O le ala lena lau Afioga, ae faatea i nuu le aina ia vaega, ua leva ona olioli atu lau Minisita, le Afioga ia Sala, e fia talanoa i mataupu ia. Ae lelei ona tatou agai loa e faagasolo le matou talanoa atu, e umi le aso fono lenei, faatoa tuua nanei i le ta o le 10.

Lau Afioga i le Fofoga Fetalai, o le fesoasoani atu lea.

FOFOGA FETALAI: Se malie ia Mulipola...

Susuga Mulipola Leiataua Laki: Faamolemole na o se minute se i avatu se faamaluluuga. Ou te iloa foi ua fai foi si mamafa o lafoga o lenei taeao.

Faamalulu atu i lau Afioga ma le mamalu o le Maota, faapea foi le uso a faipule ia Laauli. E faapena lava le o a taavale pe a oo ina overheat. E lua lava mea e te faamoemoe i ai, po o le faatali se i maalili tatala le tanevai, po o le tatala vevela ai lava. Seiloga lava la ua alu i fafo le mea lea, ua tau malu ma malu. Lau Afioga faamalulu atu, foi mai se tautalaga a lenei itumalo. Ma le agaga faaaloalo.

FOFOGA FETALAI: Ia, se i tulai mai le susuga i le faifeau le sui usufono o Lufilufi. Ia Alaiasa, ia se i aumai le saunoaga, leaga o oe e 2 ou pulou, o Lufilufi toe Aiga Sa Fenunuivao, 3 i le Uipi.

Afioga Alaiasa Muagututi'a Moefaauouo Malagaitutogiai Sepulona Moananu (Anoamaa Sasae): Lau Afioga i le Fofoga Fetalai sa nofonofu lava ma matau i le taualumaga o le tatou Fono i lenei taeao, e ese le manaia o lau tatalo sa fai ananei i le taeao, e lagona i tino lau tatalo ma lau faanonomanu i le Atua. Ae pei o le mea lena o lea ua vave ai ona osooso i luga faamoemoega o lenei taeao i sui usufono mamalu. E tele lafoga, aua e mau lava e faalele mau e matau. O le upu lea a le atunuu. Ia, ou te tatalo foi i sui usufono o le Palemene, ia aua ne i teeva le tofa i lenei taeao, ia maua pea ma toa pea le tai. O upu lava e fai i eleele foi lea o Atua le tatou nuu i Atua, "Ia ali lava utumo'u ae lilo utumā." O a foi ni faaletonu o lenei aso, ia ou te faatagisia lava ia fesoasoani mai le agaga o le Atua. Ia fesoasoani mai le agaga o le Atua ia maua le filemu i le tatou Fonotaga.

Ia pei o se matou lea soso atu ma le agaga maualalo, ia faimalu o tatou faiva i lenei aso, ia aualiitia e le mana o le agaga o le Atua le faamoemoe. A o nei upu ua felavasai, e leai lava ma ni mea moni o i ai, na o mea pepelo lava mea ia e sau. Ia manuia lau Afioga ma le tatou Fono.

FOFOGA FETALAI: Malo faafetai. Ia vaai la i ai i le mea tonu lea e igoa o le fesoasoani o lea ua fesoasoani mai. E sao lelei lava oe Alaiasa, ia vaai o la e ua toe Laauli ma Faumui, a o lea foi ua toe Tuitama ma le Toeaina? E pei e foliga... O le Toeaina e pei e onosai, a o fasipepa la e pasi mai ia Tuitama lea e ala ai ona tu i luga le Toeaina. Se Tuitama soia e te toe pasia i luma fasipepa na i le Toeaina. Ia se i tuu atu le avanoa ia Peseta. Se aua e te faauilavea i se mea e toe vevesi ai foi.

Afioga Peseta Vaifou Tevagaena (Faasaleleaga Nu.4): Lau Afioga i le Fofoga Fetalai, sa nofonofu lava ma taputapu foi i saunoaga o lenei taeao. Ae ua ou tulai atu, ona o lenei mataupu e le mafai foi ona ou nofonofu.

FOFOGA FETALAI: O le a le mataupu?

Afioga Peseta Vaifou Tevagaena: Ona o le mataupu lea na laga mai e le sui usufono o Manono, o maua lea ua aafia i le faasalalauga lea a le FAST ananafi.

FOFOGA FETALAI: Se malie ia.

Afioga Peseta Vaifou Tevagaena: Pei o lea e tau faamanino lava si vaiiliu lea lau Afioga i le Fofoga Fetalai.

FOFOGA FETALAI: Peseta, Peseta, vaai. E faapea. Se a e silasila mai o lenei a ta leaga ae e tau faafoe a o lea foi ua e toe nofo ma toe tauai mai maa e toe fai ai le misa i totonu. Ae a pe a e malie ia se i ai se taimi...

Afioga Peseta Vaifou Tevagaena: Ia, o le a ou usitaia lau Afioga i le Fofoga Fetalai, o le a ou usitaia.

FOFOGA FETALAI: Ae se i faagasolo le tatou... Ia na o le faatupu vevesi le mea lea o le a tulai mai i lou foi tulai mai, alofa mai e fesoasoani mai i le tatou galuega.

Afioga Peseta Vaifou Tevagaena: Faafetai i lau Afioga. Ae pei o le tulaga lena ona ua aafia au ma lou itumalo, ae o le a ou usitaia ona o le tuualalo mai a lau Afioga i le Fofoga Fetalai, ae o le mea lenei e fai lava si matuia lau Afioga. Ia ma lou faaaloalo lava.

FOFOGA FETALAI: Malo faafetai. Faafetai lava ia oe le uso fesoasoani mai. Ioe. Se o uiga na o le soifuaga, a o la e silafia e le Atua le mea tonu. Fai mai le upu a le Tusi Paia, "E galulue mea lelei e fai e le Atua mo le tagata e lelei ma latalata i le Atua." Se aua e te popole.

Tuitama, po o i ai se mea o...

Afioga Hon Tuitama Talalelei Tuitama (Minisita mo Tina ma Tamaitai, Atinae o Nuu ma Afioga ma Agafesootai): Faafetai mo le avanoa. Ia ona o lea sa e taua lenei foi sui usufono i te i ua faapea mai le Maota po o a ia mea e fepasiai e le Afioga i le Taitai ma lou nei foi tagata. Ua silasila mai foi le Afioga i le Palemia ua ou sauni atu i luga leaga e aafia ai foi au i i sa faatau foi lau taga araisa. O lea la ua aumai lana fautuaga, e alofa ia e faasao le taimi ae se i faagasolo le tatou Fonotaga. Ia lea la ua ou le tu atu ai, ae tatau pea ona ou tu atu e faasao leaga ne i te i ua masalomia lou nei foi tagata lau Afioga. Ma le faaaloalo.

FOFOGA FETALAI: E a la lau taga araisa, e lelei pe faaletonu? Ia, malie leaga o lea na tuu avanoa i isi sui usufono. Tulai mai lau Afioga Faumuina Tiatia Liuga o le sui usufono mo Palauli le Falefa.

Afioga Hon Faumuina Tiatia Faaolatane Liuga (Palauli le Falefa): Lau Afioga i le Fofoga Fetalai, faafetai. Leai, o le sui usufono lava ia o Palauli le Falefa, o la e fai mai le Aposetolo... Lau Afioga i le Fofoga Fetalai, o le faamalosi a Paulo ia tatou, aua e te tauia e le leaga i le leaga ae tau i le leaga i le lelei. O le mea taua lena o lea ua tupu i le taeao lenei, ua fefaamagaloai sui usufono sa sausaunoa. O le uiga lava lea o le tiapolo, e lotolotoi e faaleaga ma lepetia mea o lo o i ai le manuia o tagata. O lea la ua taumafai e faaleaga finagalo o Afioga i sui usufono na filifili mai e o tatou itumalo e saili manuia o Samoa. E le manuia Samoa i le fetuiai. Ma lou faaaloalo.

FOFOGA FETALAI: Malo faafetai. Ia, se i tulai mai le Minisita mo Faatoaga ma Faigafaiva.

Tofa Hon Lopao Natanielu Mua (Minisita mo Faatoaga ma Faigafaiva): Faafetai mo le avanoa. Se ua ou tulai atu lava ma le faaaloalo e avatu le fautuaga ia Peseta, le sui usufono mamalu mo Faasaleleaga 4, o la e avanoa lava tua i o i le fale lale a faapea lava e le malilie ia feaveai ai lima, ae leai, aua. Ma le faaaloalo.

FOFOGA FETALAI: Ia malo. Ou te manatu o le avanoa lenei Sala, aua e faapena lava fono a toeaia, ioe. A tomua tomua vevesi, ia ae faapena, e sosoo lava afa ma maninoa. Ia o lea ua tea le... Ou te manatu o le loaloa o le tatou galuega i lenei aso, o le a le toe oo foi i se tulaga faapea. E i ai le manatu, tulai maia lau Afioga Sala e saunoa e tusa ai o mea sa laga e sui usufono mamalu.

Tofa Olo Fiti Afoa Vaai (Salega Sasae): Lau Afioga i le Fofoga Fetalai, malie lou finagalo.

FOFOGA FETALAI: Oi, faatoa e taunuu mai Olo? Ia afio maia ma tala mai aao o lea foi faatoa e taunuu mai.

Tofa Olo Fiti Afoa Vaai: Faafetai. Ia leaga e pei o au lea sa... i se tala foi i le aso ananafi lea sa vesivesi ai. Faafetai lava. Manaia foi si au faalogo mai i le tatou faigalotu i lenei taeao fou. E ese le manaia. Ae sao ai Lufilufi, ia tatou alu faapena, tatou tuu i le Atua le tatou Fonotaga ma auai mai i le tatou Fonotaga ona lelei lea o mea uma. Ae tupu lava le vevesi i lau faalogo mai, o Laauli ma Tuilaepa, pei o laua ia e misa lava laua ia i taimi uma. Ia, se soia

ia e te lua misa soo. Ae o le mea e pei ona taua ai, o le tulaga lena, ia sa tatou matamata uma lava i oloa na aumai i atunuu i fafo. Ia ma le faaaloalo lava.

FOFOGA FETALAI: Ia, se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o se mea e tatau ona ou tulai atu ai. Lau Afioga i le Fofoga Fetalai, o le mataupu lea na ala ona ou laga atu e faamalamalama le mea lea na tulai mai ananafi leaga e matuia lafoga a le sui usufono lea faatoa taunuu mai. O lona uiga, e matua le o malamalama lava i mea ia sa tatou talanoa ai. Ae a e alofa lava i le tou Vaega, ia malie ia ua e tuai mai. Ae ou te faafetai atu na o oe lea na e sau ananafi.

Ia, lau Afioga o si au toe faaopoopo atu lena.

FOFOGA FETALAI: Faafetai. Ia tulai maia lau Afioga Sala e te saunoa i mea sa laga e sui usufono mamalu, le Afioga i le Minisita mo Tagata Tafafao Maimoa Mai Fafo ma isi Matagaluega.

Afioga Hon SALA FATA PINATI (Minisita mo Tagata Tafafao Maimoa Mai Fafo): Lau Afioga i le Fofoga Fetalai, o lea sa ou manatu lava ailoga a faia se lauga i lenei taeao. Ia e moni ai lau saunoaga, e feagai pea afa ma maninoa. O uiga lava ia o le soifuaga.

Lau Afioga i le Fofoga Fetalai, e faatauvaa lava le tagata. Ae ou te faatulou atu i le paia o le Maota i ona tulaga faalupe i lou solituina o lo outou paia ma mamalu i lenei taeao. Ae o le sui usufono lenei mai Malaeola ma Gafoga, aua sa aveva matou ma itumalo o Gagaemauga Nu.1, ae talu ai ona ua sui fuafuaga a le Malo e ala i faiga palota, ia o lea ua liliu ai le igoa o le matou itumalo ia Sagaga 3. Ia si ou itumalo, o le a se i taumafai atu se tatou pitovaa aua le faafofogaaga a Samoa ma le tapuaiga a si o tatou nuu.

Ua tu toa ma paia Tiafau le Malae na faaututagi ai Tumua ma Pule. Ua atumatie foi le tiasa aua ua nofoia sua ma auoloolo, ua saveioloolo ai le seuga. O le upu e masani ai tautai o le vao pe a malumaunu tiaseu o tupu ma tamalii o le atunuu ona faapea lea, ua liligo le fogatia, ua pau le tuaau ma fuamalu. A faatamasoalii foi tautaialii i le gataifale ona faapea lea po o alaaalaga, ua sina le galu, ua fati auma maualuluga o le vasa ua pau ai le tuaau ma fuamalu. Ona ou manatu lea lau Afioga, o ata na o le tatou taeao, o ata lafoia ia. Ma ou te matautia ai ma faatulou, aua le Maota o lou Palemene Samoa. Fai mai o lea ua tulutuluitao ma ua soo ona taiao. Tulou.

Ou te faatulou i le faafofoga tapuai a lau Afioga i Le Ao Mamalu o le Malo o Samoa ma lau Masiifo. Ou te faatulou foi i le paia i le afio o lau Afioga i le Sui o le Fono a Sui Tofia. Tulou le aufaigaluega paia a le Atua i so o se fatafaitaulaga.

Ou te faatalofa atu i lau Afioga i le Fofoga Fetalai. Ou te faatalofa atu foi i alu Afioga i le Palemia, alii ma tamaitai Minisita o le Kapeneta faapea Minisita Lagolago, ae a alii ma tamaitai sui usufono o le Fonousu a Samoa ua mafai ona tatou faatasi i lenei taeao.

Ou te ofo alofa atu foi ma faafeiloai i Ofisa Sili o Pulega o Matagaluega a le Malo ma Pisinisi Tumaoti.

Ou te faatalofa Samoa i ou paia, o paia e faaofigata, i le amata mai i le Tai Samasama o le Tuimanua seia paia le Taiulaula o Nafanua. O paia aua Tama ma Aiga, o Aiga ma Tama, o le usoga a Tumua ma Pule, Ituuu ma Alataua, Aiga i le Tai ma le Vaa o Fonoti.

E le faagaloina foi le Motu i Sasae. Susu Sua ma le Vaifanua, Fofu ma Aitulagi, Saole ma Saleaamua ma le Launiu Saelua. Afio le Laau na Amotasi le Auvaa o Tootoo ma upu i le Manuatele. O paia sausaugata na o Samoa o lea ua titi tonoa ma tini tauao i Tiafau nei, ua paia atoatoa ai le Malae Fono o le Palemene i lenei taeao.

O lea ua faautumoe manu o le tauafiafi ma ua faatata i Palalaua le fale o tama na suemalo. Ua api le uli, ma ua tulata le vaivaa i le taualugaina o lenei galuega i le faaiuga o le Paeaiga lenei. Ae e logo tagitagi faa-lulu le taualaga a le Fai Salamo fai mai, “Pe a uma ona tatou faia o se galuega ua lelei, ona tatou faapea ane lea, o tatou lava o ni auauna e le aoga.” Ona ia toe faamanatu mai lea, ia tatou tepa ae i mauga e oo mai ai lo tatou fesoasoani sili.

Lau Afioga i le Fofoga Fetalai, ou te momoli atu le faafetai ma le faamalo i sui usufono mamalu uma i saunoaga aemaise fautuaga ma tuualalo mo atinae ma galuega o lo o faatino nei e le tatou Faigamalo. E le tele ni mataupu sa lagalaga mai i finagalo sa faaalua e sui usufono i lenei vaega po o atinae o lo o faapea ona i lalo o lau vaavaaiga. Ae lau Afioga i le Fofoga Fetalai, o le a amata se faamatalaga i atinae tau tagata tafafao maimoa.

E le tau faailoa le tele o lona sao i le tamaoaiga o si o tatou atunuu i le tuanai. O le taimi nei, ua outou silafia le Koviti, ua pagatia le tamaoaiga, ua leai ni tagata tafafao mai o toe asiasi mai i si o tatou atunuu. Ua le na o Samoa la, a ua faapea ona pagatai ma aafia uma ai le lalolagi atoa. O aafiaga la o le Koviti ma le... ua faapea ona aafia uma ai le 140 o faletalimalo i Samoa, aafia atu ai ma faleaiga, aufai mataaga, taavale totogi, o tour operators, ma ua toatele ua vaega ma ua le toe maua ni galuega. Lau Afioga i le Maota o Samoa, e ui lava i nei faigata ae o lo o faapea lava ona tuu atu ma le atoatoa le tauau o lou Malo e fesoasoani i so o se vaega aua le atiaeina o si o tatou atunuu, o le tatou sao foi lea. E i ai le lagona ou te nofo ma au e faapea, o le manuia o se nuu, o le galulue faatasi. A tatou fevaevaeai, ona le atoa lea o le malosi ma o i ina e le maua ai se malosiaga e tataua ona i ai le tatou tamaoaiga.

Ou te fia taua ni faatusatusaga i tausaga ua mavae i le aofai o tupe maua na mafai ona maua mai e lenei alamanuia. I le tausaga e 2014 i le 2015, o le aofaiga o tagata na asiasi mai e 133,070. O le tinoitupe na maua mai ai e

\$347.5 miliona. O le tausaga e 2015-2016, o le aofaiga o tagata na asiasi mai e 146,105. O le tupe maua e \$385.1 miliona. Tausaga 2016-2017, 146,437 le aofai. O le tupe maua, e \$387.6 miliona, 2017-2018, o le aofaiga o tagata na asiasi mai e 153,323. Tinoitupe, e \$454.2 miliona. I le tausaga e 2018-2019, o le aofaiga e 178,564 le aofaiga o tagata. O le tupe na maua e \$514.10 miliona. 2019-2020, ua pau, ua i ai le pau tele. Ou te manatu o lena ua outou silafia le mafuaaga, e fai o le Koviti, a o le Misela. E 124,399 tagata na afea le tatou atunuu. Tinoitupe, e \$375.30 miliona. Ua matua maualalo le tausaga 2020/2020. O le aafiaga tuga lea o le Koviti. O nei fuainumera e faatusatusa ia i latou faimalaga mai, o le 77% o malaga mai totonu o Niu Sila, Ausetalia ma Amerika Samoa.

Ona ou oo mai loa lea i femalagaiga a vaalele. O le toe amatalia o faigamalaga a le Samoa Airways i Niu Sila ma Ausetalia i le tausaga 2017, e tele sona sao i le faatupulaia o le fuainumera o tagata tafafao maimoa mai, e le gata lea i le pau maualalo ai o pasese, aemaise o le faaopoopo atili o nofoa sa avanoa aua faigamalaga mai i o tatou maketi autu i tulaga tau faalauiloa i atunuu i fafo. O Samoa o se tasi o atunuu taugata a latou packages. Talu ona taunuu mai le Samoa Airways, ua pau maualalo ai pasese ma ua tele foi le avanoa e tauva ai Samoa ma isi airlines.

I aafiaga o atinae a tagata tafafao, e tele le aafiaga o atinae i le tausaga faaletupe 2019/2020, ona o le faamai lenei o le Misela, lea na aafia ai le atunuu ia Novema 2019 faapea le Koviti-19 ia Mati 2020/2020. Lea na tapunia ai loa ma alavaa ma faasaina ai loa le ulufale mai o tagata tafafao mai fafo. E 30% lea na faaitiitia ai le aofaiga o turisi pe a faatusatusa i le tausaga 2018/2019 ona e na o le 3 kuata o le tausaga lea na tatala ai alavaa. E 27% na faaitiitia ai tupe maua, lea sa pau ai i le \$375.3 miliona mai le \$514.1 miliona sa maua i le tausaga 2018/2019. O a la aafiaga, o a aafiaga o le Koviti ma le Misela, a o aafiaga ua mafua ai? Ia, o le a ou tolaulau atua lau Afioga ma le paia e o le Maota. E 5,651 le aofaiga o le mamalu o le atunuu sa faafaigaluegaina i lenei atinae i le faaiuga o le tausaga e 2019. E 3,877 le aofai atoa po o le 68.7% le afaigaluega i le atinae ua aafia avanoa faigaluega, ona o le pau o fuainumera o tagata tafafao mai. 2,706 i latou ua faamalalo mautu, ae 1,171 i latou ua faaitiitia a latou itula faigaluega i le tai 20 itula i le vaiaso, 20 itula. E 1,774 le aofaiga o lo o totoe pea ma faafaigaluegaina i le faaiuga o le tausaga e 2020.

O galuega faatino i lalo o faiga faapaaga ma Malo mai fafo. E le faaitiitia le faafetai i paaga o lo o i Niu Sila o lo o fesoaoani mai pea i le fausia ma le faatuina o faailoilo ma talafaasolopito o mataaga taitasi. Ua maea ona faatutu nisi o faailoilo i mataaga i lalo o le vaega muamua o lenei polokalame. O nei mataaga e aofia ai le Ana o Tagata Pupuu i Paia, Tulagavae o Moso i Falealupo, Falealupo Canopy Walk ma le Fafa o Saualii, o le Vai Suatoto ma le Ana i Laauoleola i Aopo, vaitaele o le Mataolealelo i Safune ma le Peapea Cave i Paia. O le faasao o faisua i Savaia ma le Afu Fuipisia o

Lotofaga. O le aofaiga o tupe ua faaaluina i ia vaega, e sili atu ma le \$100,000+ tupe faaalu i nei poloketi, e aofia ai ma Upolu, aemaise le toe faaleleia o nei faailoilo ua faaleagaina e tatou tagata.

FOFOGA FETALAI: Ou te faamalie atu i lau Afioga i le Minisita, ona o lea ua tatou taunuu i le tatou malologa, se i faamaea le saunoaga. E manatu foi e le o toe tele se vaega o le saunoaga mo le aso. Ae se i tatou taliu mai i le tatou malologa faamaea le saunoaga a lau Afioga i le Minisita.

Ua faataatiaese galuega a le Fono Aoa mo lana malologa masani.

Na faataatiaese Taulumaga a le Fono Aoa Faitulafono mo lana malologa masani i le itula e 10:45 i le taeao ma toe faaauau i le itula e 11:40 i le taeao.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu 1) 2020/2021.

FOFOGA FETALAI: Ou te faasilasila atu ua toe amatalia Taulumaga ma Galuega a le Fono Aoa. E i ai le manatu ua faaopoopo foi le malosi e faaauau le tatou galuega i le paia o le Palemene, faapea foi Ofisa Sili o Pulega o Matagaluega ma Faalapotopotoga a le Malo. Ma e fai le malologa o faapena ona saunoa le Afioga i le Minisita o Tagata Tafafao Maimoa mai.

Ou te tapa ma le faaaloalo lau Afioga Sala, lau Afioga i le Minista.

Malie lau Afiog ai le Minisita o lea e tulai mai le Afioga i le Tuiatua faanofonofu, le sui usufono mo Aleipata Itupa i Lalo.

Afioga Tafua Maluelue Tafua (Aleipata Itupa i Lalo): Faafetai lau Afioga i le Fofoga Fetalai, faafetai mo lou avanoa. Ua ou tulai atu ma le agaga faaaloalo, ona ua ou maua le saunoaga a lau Afioga, e faamaea atu le saunoaga a le Minisita o Turisi. Ae o au sa ou fia faalavelave lava analeila, ae ua ou popole lava ina ua e saunoa mai, e faamaea mai le saunoaga a le Minisita. O le mea la lena, o lea ua ou tulai atu ai ma le faaaloalo. E 2 vaega, faaopoopo se isi aso o le Afioga ia Sala mo lana saunoaga faa-Minisita aua toe pau lea o le lauga a si toeaina. Lona lua, o le tu atu e faafetai ma faamalo i lenei Minisita lelei ma le atamai, i le faasoasoina o tupe maua mai le Matagaluega lea o le Turisi. O lea sa ou faalogologo lava lau Afioga i le Fofoga Fetalai, o le mea e fia faamalamalama ma faamanino, po o le tolaulauga a le Afioga i le Minisita. E matau atu i le tupe e amata atu lava i le 16 i le 385, o lea e i le va o le \$300+ miliona. Oo mai le 2018 ua \$454 miliona, ua siisii lava i luga. Oo mai loa i le 2019 ua \$514 miliona, o le

matua tele o lea vaega tupe, a o le mea e ofoofogia ai, 2020 o lea lava e \$370 miliona. E to la lou pulou i lau Afioga Sala, e le faaviivii atu, e pau lava le agaga ma le faaaloalo ua ou faafetaia le tele o lenei seleni e maua. E sao lava le upu o lau lauga pe a matau mai. Na ou lauga faapea, e pau lava lea o le tala o le tupe a Samoa e matua valelea ma niniva ulu o le au economist la e i fafo. Pe a faafogafoga mai i le tele o a tatou alagatupe eseese. E le gata i le turisi lava ia na o le turisi, ae masalo a vaevae le tupe lea, o le tele lava foi pe se kuata po o le afa, e maua mai o tatou lava tagata e o mai faa-turisi e o mai i inei. O le mea la lea e momoli atu ai le agaga faafetai ma le faamalo i lau Afioga i le Minisita.

A o le mea lea na ou tulai atu ai lau Afioga i le Fofoga Fetalai, o lea ou te faalogologo ma le totoa i le saunoaga a le Minisita. Mo le silafia e lenei Palemene, ua le na ma se laina o lena tou te silafia le vaega uma ia. O le au faamanuiaga po o le spin offs o le manuia e maua mai e tatou... o le vaega foi lea e fai taavale, rentals, o pasi, o taxies, o faletalimalo, e le gata i totonu o maids. O tamaitai foi ia e faia moega ma kiligia le hotel. O kuka, aemaise foi le mamalu o le atunuu, aua e o taumamafa i faleaiga o faletalimalo. O fale mataaga, o falemataaga se i ou toe oo mai i ai, o le mea lena na ou tulai atu ai. E i ai le mea ou te fia talanoa atu ai i mataaga. E le gata i lea o faailoilo, e tasi lea galuega taua o le faailoilo, o le taua ia. E i ai le mea na tupu i Kalaisetete mo le silafia...

FOFOGA FETALAI: O sau saunoaga faalauaitete po o sau faauilavea.

Afioga Tafua Maluelue Tafua: O le mea lea na ou faauilavea ai lau Afioga, o falemataaga. Ae se i fai atu muamua lau tala i le faailoilo, semanu o lea ua ou oo mai i ai, leaga e taua tele lau Afioga i le soifua laulelei ma le soifua saogalemu o tagata. E i ai le stop sign sa fai i lalo i Kalaisetete, o le auala umi lava e magafa. Ua o atu la tamaiti ua gaoi le mea lea, aveese, faaleaga ese le stop sign. Na feoti ai tagata, tulou, e moni lava le tala lea ou te fai atu, o le mea lena na tupu. O le mea la lea e pei o se tuualalo ma se fautuaga, tautuana a tatou faailoilo aua le faaleagaina. E tatau foi ona i ai le pulega a alii ma faipule i le vaega lea.

Ae se i oo mai pea la i le mea na ou tulai atu ai, o mea ia o mataaga lau Afioga ma le faaaloalo. Ua ou maua i le saunoaga a le Minisita, faasao mai au pe a ou sese Sala. Na e saunoa faapea, e na o le \$100,000, a million hundred thousand? E na o le \$100,000 na aumai e faalelei ai mataaga. Lau Afioga, o le matua tele o tatou mataaga. O lau tuualalo la o lea e faafogafoga mai le Minisita o Tupe, se tuu i ai se \$500, ave se afa miliona e faaopoopo i le vaega lea o tatou turisi mo le faaleleia o mataaga. Aisea? Aua e le faapea na o turisi papalagi e matamata lau Afioga, e te afio foi i ai lau Afioga pe a e malolo, pe a e litaea. Ma le faaaloalo.

FOFOGA FETALAI: Ia malilie ia sui usufono mamalu, o le avafatafata lava e faapena ona fetuunai. E tasi lea sui usufono matua o lea itu o le Maota, tatou te le iloa pe toe sau, ae o lana toe fautuaga lea ma lana tuualalo. E i ai le upu foi lea a le Malo, ia taatia atu ia i lau Afioga, o lea foi ua saunoa faafetai i galuega a lau Afioga. Ia malo faafetai le galulue.

Tulai maia lau Afioga Sala.

Afioga Hon SALA FATA PINATI: Lau Afioga i le Fofoga Fetalai, ou te faafetaia le uso mai le Itupa i Lalo i le saunoaga. O le mataupu lea sa laga pe \$100,000, e leai o le mea moni lava ia e ova. E i ai le plus i le \$100,000 lea ua faaoga, e le o taua uma atu le vaega seleni na alu. Ae ou te iloa e tele le tupe ua alu. Ma o le fuafuaga mamao foi, e faatupulaia le vaegatupe e ono faaoga ia tatou galuega o faatino nei. Ua taua faailoilo, e i ai le vaega fou lea ua i ai, e toe 3 masina taunuu mai, o le google maps. O le a le uiga o le google map, o le uiga, e i ai le telefoni, o i ina o le a faaoga. O ē e malaga mai, ato ai ma le tatou atunuu, pe a fai e te manaomia se faasinoala, po o fea lava le faletalimalo, o fea foi le nuu, po o le aiga. E mafai ona e faapea atu i le masini, tuu mai le fale o Tafua Maluelue i Matautu. Ona faapea lea, o lea o le auala lea e alu ai. O i lea ua i ai le vaega lea ua taatia mai. O lona uiga, o le a pei Samoa o atunuu mamao. E te le toe sailia po o fea le mea e te agai i ai. E te ulufale loa i totonu o Samoa, ua ia te oe le means po o le auala e mafai ai ona e fesootai ma e faaoga lea vaega o masini. E ono tau mai ai ia te oe, le tulaga e ao ona e faatino e te maua ai le afioaga po o se falefaigaluega o lo o e fesiligia pe manaomia foi.

Mo se faaitaiga, e te nofoia loa le taavale, ona e saunoa loa lea i le masini e faasino mai le nofoaga e te agai i ai. O le uiga lena o le google map. O le faaleleia la o mataaga, o le vaega muamua o lenei polokalame, sa faaleleia nisi o mataaga i Upolu ma Savaii. Ma o nei mataaga e aofia ai, Afu auu i Palauli, Saleaula Lava Fields ma le Lanuolaola Cave i Aopo. O le afu i Fuipisia faapea foi ma le afu i Sopoaga, e tusa le tau aofai e NZ\$480,000 po o le \$913,000 na faaogaina i mataaga nei. Ae le pau ai i, o lo o faagasolo pea, o le faaauau le faaleleia o mataaga i le tausaga lenei ma toe sasaa atu foi nisi o faamanuiaga i afioaga taitasi, aua o latou atinae, o mataaga. O lea e i ai afu o Papaseea i Seesea, Papaitai waterfall i Tiavi, le Swimming Turtles a Leapai, faasao faisua i Savaia, o Asaga Mangroves ma le Palolo Deep i Apia. O le tau aofai o le seleni e ono alu i i. e \$1.3 miliona po o le NZ\$760,00, le vaegatupe lea o lo o faaagaga mo galuega e faalelei ai mataaga nei. Ia silasila i le tele o faamanuiaga o lo o sasaa mai. Ma e momoli ai le agaga o le faafetai.

FOFOGA FETALAI: Ia malie le sui usufono, lau Afioga i le Minisita, se i tulai mai Tiatia Liuga o Palauli le Falefa.

Afioga Hon Faumuina Tiatia Faaolatane Liuga: Faafetai i lau Afioga mo le avanoa. O lea ua ou faalogo atu e le o taua mai ia mataaga lea o lou itumalo, ua fai sina leva o ou tuualalo ai ma ou talosaga i le pulega ma le Afioga i le Minisita, o le Papa o le Faatolotologatama. O le isi mea o le Maasogi, a e sogi i ai, ua puupuu le auala o le mativa. O le isi vaega lau Afioga, o le Faugagana, o le isi vaega o le mea sa nofo ai le toaina o Taemanutavae. O mea ia, na tau i ai, e sili atu, o le faavavau ia e tatau ona mataina. E tele ia turisi e i ai, ma e lelei foi lea e fai i ai auala, ina ia mafai ai e turisi matamata ai. Aua o tama aupito sili ai lea ona tupea tatou, o tala o le vavau. Ma lou faaaloalo.

FOFOGA FETALAI: Se i faamau ifo mea o lo o faapena ona... o le tama o Taemanutavae. Tulai mai le sui usufono mo Falealili, Afioga ia Aumua.

Tofa Aumua Isaia Lameko (Falealili Sisifo): Faafetai i lau Afioga i le Fofoga Fetalai mo le avanoa. Faafetai i lau Afioga i le Minisita e tusa ai ma le tolaulauga o tatou mataaga. Ae ua ou manatuaina sa ou lauga ai foi i mataaga. Se tasi o mataaga i le matou nuu i Malaemalu, le vai lea o Punaotala. Ae le gata i lea o le vai lea e i Togitogiga, o lea o lo o misi mai i mataaga ia. E tasi lea o mataaga o lo o faapea ona faaaogaina e le toatele o le mamalu o le atunuu. E talosaga ai lau Afioga, se i toe silasila ane i mataaga ia. Faafetai.

FOFOGA FETALAI: Se i tulai mai le Minisita o Mataaga.

Afioga Hon SALA FATA PINATI: E faafetai atu i sui usufono na laga ia vaega e pei ona i ai. Mo le silafia e le paia o le Maota, ua leva ona tuualalo mai ma aumai manaoga o Palauli le Falefa. Ae o le tala e le o se tala ole, o le tala moni lava. E leai se mea e tuua, o lea ua tatou oo mai i le taimi lenei o le siui o lenei Paeaiga. E toe oso pea le la, e oso pea le la ma e fai aso le Atua. A i ai lou talitonuga ma lou faatuatuaga o lo o soifua pea le Atua, ona e faapea ifo lea. Le Alii e, aumaia ia te au e tusa ai ma lou finagalo. E tino mai galuega, aisea? Aua foi o lea mataaga ua leva ona moemiti i ai le atunuu lenei. E leai se mea e tuua i mataaga i Samoa, o lea ua i ai fuafuaga a tatou, e pei ona aumai ai polokalame, lea e avatu i le TV, e faalauiloa atu ai tafaoga i Samoa. O lea ua maua mai foi tala i fafo, Sala, sa faapea matou, e le o i Samoa ni mataaga matagofie, ae faatoa maua lea o le faaaliga ma ua matou vaai tino i ai, ina ua aumai aloaia lea matafaioi. Ua silasila le atunuu i fafo, i le tafaoga lea ua avatu i le TV. O le agaga lena.

Mo Falealili, faafetai. Ou te manatua le tatou o ma Fuimaono, tali foi le sua i tua. E le galo le luau lea e fai i le tipolo, tailo pe ua outou tofo, ailoga ua outou tofo i le luau lea e fai i le tipolo. Aua o le tala moni lava, amuia Falealili ia... faafetai Fuimaono ma Sili, se ua ta tofo, sa ou faapea au, e sili

ifo le pisupo ma le falai povi. Ae o lea ua ou molimau, se e malo lava le taumafa Samoa. Afai ua faafofoga mai fale o mataaga i totonu o le tatou atunuu, aua aua nei toe kukaina ni meaai papalagi. Fai mai le mau a se tasi o fai faletalimalo i Savaii. Na ou fesiligia o le a le mea e le fai ai meaai, taumafa Samoa. O le tali na aumai, ma o le tali moni lava lea. E sili atu le taugofie ona faatino meaai papalagi, i kuka tau papalagi na i lo gasesega o le mea taumafa e taumafa ai le Samoa. Ia o le tala lena, aua a tatou o nei, o tatou o atu i se fale ae faapea mai, e na o fish and chips ia e maua. O lea e maua...o isi lava mau mea, o fuamo, o sanuisi e fai i eleni, tulaga faapea. Ae fai atu la i ai, e pei ona fai mai ai le Palemia, e i ai la ni tou panikeke mafolafola, ae fai mai, e leai. E i ai se vai tipolo, e leai foi, aisea? O le a le mea e le gasese mai ai mea e iloa ai le atunuu. A ua silafia lelei, o e e agai mai i fafo, e fia omai e tofo ma fia vaai i tu ma aga faa-Samoa moni. Lau Afioga, e faatino uma mea na pe a fai e tusa ai ma le finagalo o le Atua. Aua ua lata taimi o le vai vaa. A fai atu nei se poloaiga a o se mau e avatu. Ae fai ifo le palota fai mai, talofa e, o la ua malolo atu si toeaina ua faiaina leaga lava i le palota. E leai, aua ne i o tatou popole, tuu i le Atua o tatou vaivaiga.

O au ou te le lotu, o le tele o Aso Sa ou te le lotu, ae e i ai lou tatalo tausii. O lau tatalo lea e fai, ia Iesu le Agaalofo Divine Mercy. O le 3 i le vaveao ma le 3 i le aoauli, ou te le tau atua faapea ai ou te fia paia. A o le tagata lava e vaivai, e vaivai lava le tagata, ae a e alofa i le Atua ma e faamaoni, e fai e le Atua mea silisili mo oe ma au.

O le faaleleia o mataaga, e alu alu le vaegatupe lea e NZ\$480,000 po o le \$913,000, o le faaauau lea o faaleleiga o mataaga i le tausaga lena. Ma toe sasaa atu foi nisi o faamanuiaga i afioaga e le i oo atu i ai. Ma o le tau aofai e ono alu ai, e \$1 miliona \$300,000 po o le NZ\$760,000. O lea ua amata ona tapenapena tauofoga mo le faatinoga o nei galuega, ona faasalalau loa lea. O lo o fuafua e maea nei galuega faaleleia i le masina o Iulai.

Aoaoga, mo tagata faigaluega ua leai ni galuega. O lo o faagasolo i le taimi nei ia galuega. O le tumama lautele ma le faaogaina lelei le puipuiga talafeagai, e pei o talifofoga aemaise o vailaau talafeagai mo le faletalimalo. O lena aoaoga, o le a galulue soosoo tauau ma le Matagaluega o le Soifua Maloloina. Ia faapea ona tutusa ia le faletalimalo, aemaise o tagata faigaluega i le puipuiga talafeagai mo le Koviti-19. Ina ia saogalemu tagata faigaluega ma faaitiitia le avanoa e ono pipisi ai le faamai. A maea nei aoaoga, o le a tufa fua ia vailaau e fesoasoani ai i atinae aua le faatumauina o le mama lautele mo malo asi mai. O lo o i ai foi nisi o aoaoga fuafuaina e amatalia ia Aperila ma Me e pei o le Digital Marketing, po o le faalauiloa ma le gasesega o taumafataga e pei o keke, o pai. O lea e taua faapapalagi o le Talantary Training Pastry Training.

Lau Afioga i le Fofoga Fetalai, e uma le itula o ou tolaulau le aofaiga o aoaoga eseese sa faagasolo i totonu o le 5 tausaga. Ae ou te manatu ua lava lea mo lena taimi. Ae o le a faagasolo pea le tolaulauga pea o le galuega,

leaga e le i maea le galuega na tofia ai lou sui usufono. O le tele o nei aoaoga lau Afioga, pe a le faamuamua i tama fanau, e tatau ona faamuamua o tatou tagatanuu. Ia aotauina tagata ia o latou silafia, ia mea e ao ona faatino ma tatou sauniuni. Aua e i ai le taimi e tatala ai femalagaaiga ae ua silafia e le atunuu, le mea e ao ona faatino. E avatu ai le igoa o le atunuu i le tumama, lau Afioga. E sili atu ma le \$1 miliona ua faaalu, e siitia ai le tomai, ia i latou e sili atu i le 2,000 le faitau aofai i totonu o le 5 tausaga talu ai. Aoaoga faatino i lalo o le fesoasoani a le Malo po o le Stimulus.

O le a faaauau pea aoaoga mo tagata faigaluega, o nei aoaoga o le a faatupeina i lalo o le fesoasoani a le Malo, mo le alamanuia o tagata tafafao, e tusa lona tau i le \$1 miliona. E le gata ina maua a latou faailoga, e mafai ai ona faaaoa i atunuu i fafo, ae faapea ona siitia ai le tomai i galuega, e maua ai ia alamanuia ma maua ai foi a latou alauni i lea vaiaso i lea vaiaso, e fesoasoani ai i aiga. I le taimi nei, o nisi nei o aoaoga, ua maea ona faatino ma faataunuu. O fesootaiga, ma tekonoosi faaonaponei, gagesega o taumafataga ma le tapenaga o vai taumafa. Ma auaunaga e tali atu ai i malo. Tusi Pasi 2 mo tagata tafafao mai, ma auaunaga talimalo, tourism hospitality. E sili atu i le 500 i latou ua maea ona aoaoina i lalo o le fesoasoani leni a le Malo. Ma o lo o faaauau pea nisi o nei aoaoga, ma faatupulaia ai pea lea fuainumera. O nisi la nei o aoaoga o lo o fuafua e amata i le masina nei, ma le masina fou. Aoga mo le au teufale, housekeeping, certificate... leadership management. Poloketi o faleletaua. O lo o faagasolo pea le isi polokalame aua le fausiaina o faleletaua, mo le mamalu o le atunuu. Ma e sili atu i le \$500,000, ua faaalu i leni poloketi. O tupe nei o tupe na fesoasoani mai ai le EU, e faipaaga ma le tatou Turisi ma le Matagaluega o le Siosiomaga. Ma o nisi nei o fale ua maea ona fausia ma ua faaaoa nei. I Upolu, Robert Stevenson i Vailima, Tiavea-uta, Saleaamua, Lepa, Togitogiga, Lotofaga Safata, Saleimoa, Fasitoo-uta, Manono-uta. Mo Savaii, Vailoa Palauli, Fagafau, Aopo, Saleaula, o lo o i ai le poloketi lea e fai i Neiafu, o lea e faatino nei toetiiti lava maea.

O le polokalame o le suiga o le tau, climate change. E sili atu ma le \$2 miliona ua faaalu i polokalame eseese, e faataatitia ai aafiaga o le maaleale tele o le tau, i leni atinae. Sa fai paaga ai Niu Sila, Malo Afaatasi, e pei o fausaga faaneionapo i Manase, o lo o i ai le uafu i Manase po o le mea ua tanu, e taofi mai ai le sau o le sami ma avatu le oneone. Ae o le tulaga lea ua faatuputupulaia ai, le oneone e maua i uta, ona ua i ai le mea lea ua separate ai i tai, e taofi mai ai le avatu o le oneone i le gataifale i Manase. Ua maea fausia foi nisi o fale, e mafai ona tali atu i aafiaga o le tau ma nisi o fesoasoani i Upolu faapea Salafai. O lo o saili foi i le taimi nei nisi fesoasoani ona o lo o matau pea le aafia pea o o tatou mataaga, ona o suiga louloua o le tau. Ia tatou tatalo, ia faapena ona liuliu mai ala o le lupe ma foai mai e tatou paaga i fafo ni seleni ia aua alamanuia o o tatou tagata.

O le polokalame o le faalauiloa, i totonu lava o Samoa. O lea e nofonofoloa le Malo, e ala i le uunaia pea o lenei atinae, i totonu o le atunuu, ma le kelope e ala i le faalauiloa i le nusipepa, polokalame i le TV, upega tafailagi ma isi. O nei polokalame e le gata e faalauiloa ai, a o lo o uunaia ai e lagolagosua ia tatou mataaga ma faleaiga, e pei ona faalauiloa i luga o le TV i Tafaoga ma le Kuka.

O le Kuka e faalauiloa ai le gasesega o mea taumafa, e pei o le farm to table iniatiive. Ua o tatou iloa ai foi le eseesega o meatotia a o le tomai maua i luga o alo ma fanau Samoa i le gasesega o mea taumafa, o lo o maua i totonu o laufanua o Samoa. O le Tafaoga, o lo o faalauiloa uma ai lea o tatou mataaga e tele i Samoa nei.

Lau Afioga i le sui usufono o Palauli le Falefa, ua leva ona tatou talanoa i le vaega lea, faaleleia o mataaga lea na e taua. O i ai le fuafuaga, a toe faatului mai ni vaegatupe e faatino ai galuega fai a le Matagaluega a Turisi, ou te le oole atu. E faatino lava, e pei ona manaomia le fesoasoani, o lea ua e faafofoga Samoa ma le Maota i lau folasaga, o lea foi ua tali atu le Malo, e tuu i fea? Afai e lelei ai le lumanai o le atunuu, fai aua le fefe. O lo o sisila le Atua i mea e lelei mo le atunuu, faatino loa.

O se taimi o i luma, o taatitia mai nisi o galuega tetele, o lo o faagasolo nei Niu Sila aua le faalauiloa pea o Samoa e pei o le Electronic Billboards, vaega ia e molimauina i Aukilani, o lo o faapea ona faaoga aua le silafia i le mamalu o i latou o aumau i Niu Sila, ia mea o lo o faapea ona taumafai ai si o tatou atunuu. E vaivai, a o faamanuiaga a le Atua, e le faitaulia. E le mafai ona tatou tau le alofa o le Atua, ave le faamua i le Atua, ia o tatou faia mea silisili, mea e pau mai ai le mafai, lau tautoga i lau galuega faatino, o le tatou matafaioi lea, oe ma au. E le na o matou, po o latou e faigaluega e faatino galuega.

O oe o le tina, oe le tama, oe le matai oe le tofi, tautuana, e tasi lava ia lo tatou faamalu, e tasi lava o Samoa ma lona lumanai. Ia manuia le alo atu o lo tatou atunuu.

FOFOGA FETALAI: Malo faafetai.

Afioga Hon SALA FATA PINATI: E maua foi lenei avanoa e momoli atu ai lau faafetai, le auau i lo tatou atunuu, aufaipisinisi, aiga, aulotu, aoga Matagaluega ma Faalapotopotoga uma lava o lo o faaogaina lenei auaunaga ma fesoasoani i si o tatou atinae. O lau pule lea ua le ole... lau lagolagosua e moomia aua Samoa ma lona lumanai.

E le o tuua foi le faalauiloa i a tatou maketi i fafo aemaise lava Niu Sila ma Amerika Samoa, e toe tatala ifo ia tatou femalagaiga, o lo o faalauiloa pea Samoa i fafo. E toe tatala mai alavaa, e le toe tau amataina ae o le a faaauu pea galuega faalauiloa. The show must go on, aua tatou te nofonofoi.

Ua maea faalauiloa le fesoasoani a le Malo e ala i le stimulus, e fesoasoani atu ai e faamama avega e ala i aoaoga a i latou ua le o toe faafaigaluegaina, ina ia siitia le tomai ma ni fesoasoani tau seleni, ae e le gata foi i lea, o fesoasoani i pili totogi o le suavai, pili o eletise, wage subsidies. Faiga paaga ma le Matagaluega o Faatoaga, o lo o faagasolo nei i faamama avega o tului mo nonogatupe ma isi.

E le tuua le agaga faafetai i lau Afioga i le Minisita o Tupe, mo lau faasoa faapea le Faauluuluga o le Matagaluega. E ui ina utiuti ia lo tatou tamaoiga, ae o lo o tuu mai pea lou tauau, e fesoasoani. E le gata i lea, o polokalame faagasolo e pei ona taimua ai le Minisita o Faatoaga, malo Lopao, malo le tau, malo le faatoatoa, lau pule lea. Faafetai tele i a outou Afioga.

E i ai le manatu maualuga, o le a toe afea lenei atinae i nisi o fesoasoani a le tatou Malo i le lumanai. E pei ona taua e nisi o sui usufono, o le atinae o le poutu o le tamaoiga, e i ai foi le manatu o le a tele lona sao i le toe atinaeina o le tamaoiga pe a maea le faamai, o lo o pagatia ai si o tatou atunuu ma le lalolagi. E i ai foi le manatu mafanafana, i le faatasi mai o le Atua, o le a toe foi lenei tamaoiga i le tulaga sa i ai muamua, ma e o le a sili atu lona lelei, pe a faatusa atu i tausaga ua tuanai.

Lau Afioga i le Fofoga Fetalai ma le mamalu o le Maota, i le masina talu ai i le tatou Fonotaga, sa faapea ona avatu se lafoga po o se lagona o lenei lala o le Malo, e tusa ai ma ana miti. Ma sa ou taua ai faapea, e i ai le fuafuaga alualu mamao, e ono ausia le vaegatupe e piliona tala i le 2 tausaga o lumanai nei. Ae paga lea, ua le taunuu, ae tuu i le Atua, leai o Samoa fai mai ua Faavae i le Atua lo ta atunuu. O le a la le uiga? E le i faia e tatou te omai ai e saili ai ni o tatou lelei. E pau lava le agaga na tofia au, ma ou te iloa na ala ai ona faapea mai le Atua ma tofia lou nei tagata, ia avea au ma auauna, ia avea au ma auauna faatauva.

Ou te leiloa po o le a se lelei, ae o le upu lava ia e tautino, a e faamaoni i mea iti, e te pulea mea tetele. Ioe.

FOFOGA FETALAI: Malie, e moi.

Afioga Hon SALA FATA PINATI: E amata mai i lou lotoifale, mai i totonu o lou aiga, lou pulea lelei o mea. A lelei foi ona e faasoasoa, ia e alofa atu i le lua te tuaoi, e pei ona alofa le Atua ia te oe, e tupu lava mea avea.

Lau Afioga i le Fofoga Fetalai, o le manatu e le uma, ae ona o lo o i ai pea nisi vaega o le tautalaga o lo o fia faamaea, o le ala lea ia onosai mai, ioe. Se e ese le manaia o le tatou Fonotaga i lenei aso, ae o le upu moni lava, sole ua matua gagase vae o tagata sole e tu. Ia ana faapea la e usu se pese foi lea tatou...

FOFOGA FETALAI: Ia, e fua i le malosi lau Afioga.

Afioga Hon SALA FATA PINATI: Ia o lena. Ona ou oo mai lea lau Afioga i le Ofisa o Suetusi Sili ma Suetusi...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai...

FOFOGA FETALAI: Ia, se i vavae foe, maua se malologa se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Pei ua augani le Minisita se i tulai atu se i malolo, ua lē lava tu tu. Ia o lea ou te... ae le i see ese le Minisita e toe faataua le itu lea o tagata asiasi maimoa mai, ona o lea ua faafogafoga i le faamaninoga a le Minisita. Na ausia le afa piliona tala, mai i le alamanuia leni. Ma e mafua lava ona toe tifa ifo i lalo, ia ona o le faamai o le Koviti, ia faapea foi ma le misela. Na amata mai i le taimi o le misela.

A o i la, o lea e atagia ai le isi luitau tele, e avea ma auala e aafia ai leni atinae tele. Ma o le mea moni lava, o le atinae leni o lo o pito sili ona tele seleni a le atunuu, e pito tele foi tagata e maua ai galuega. O le itu la lea e taua ai le toe faataua ai le mea lea o faaleleia o itu ia i tulaga o tatou vavau. O vavau ia e fia omai ai tagata iinei i Samoa, ae e le o ane i Fiti, pe o ane i Toga po o mataaga.

Ae o le taua o mea ia o mataaga, e avea o ni mataaga e fou. O lona uiga e le maua i Toga e le maua i Fiti ae o ni mataaga e mafai ona omai ai turisi, ona le 2 lea o aso ae atoa le 4, 5, 6, 7, 8 ia aso iinei e faaalu iinei. A tele aso, ua tele tupe a le faletalimalo. Tele tupe a i latou e faatau a latou niu, faatau latou ili foi lea e tapilipili ai i le vevela.

O le taua la lea o lea ou te toe tulai atu ai, i le itu lava lea o le faaleleia o mataaga, ma e ala la ona alu ma tau nofo, ia ona o le tulaga ia tau tupe e taua tele. Ma e a oo loa i mataaga, o ni mea e fou. E maua le la i le nuu e sau ai le turisi, e maua ai le sami, e maua ai fagaoneone, e maua ai afu. O le a la le uiga o lea mea? E le tau sau i ni afu, e le tau sau i ni vaitafe, e le tau sau e vaai ni fia faala. E le tau sau foi e fia taele i matafaga o la foi e i ai latou matafaga. Ae o le mea e sili ona taua, o mea e le masani ona maua, i o latou atunuu. O le mea lena o lea a matau mai, e i ai ia ituaiga mataaga, o lea e agai i ai, mea e le maua i fafo. E i ai la mea ia, e tai pei o le Pulemelei. O le Pulemelei, o le piramita e pito sili lea ona tele i totonu o le atu Polenisia, o le piramita e fau i maa. E matua maualuga lava, ma e le maua lava i se isi atunuu o le Pasefika le tele o le piramita lea e i Vailoa o le Pulemelei. Tele tagata e le i oo i ai. O ituaiga mea la faapena, mea uiga ese e omai ai, e le gata i lena, ae o le Aua ma Laumei. E fou i tagata mea ia, toe tuu ane ma le Tosua ma le Tolesua, e fou foi i le latou faalogo. O mea la ia e taua i ai latou.

Ia, ae e ui ai foi la ma faalavelave ua tutupu i nisi o tatou vavau. Leaga o tatou vavau, e i ai foi ma mea foi o tulaga foi ia mo mea, mo mea foi ia e tau lualuagia po o tapufanua, tapuafanua. E mamai mai isi, e tai pei o o Savaii i le Ana o Tagata Pupu. Ua tele tagata e mamai mai ai i ina. E oo foi la i le To Sua, ua tele tagata e feoti mai ai i ina. O mea la ia, e taua tele ona i ai ni faasilasilaga, e i ai le lamatia o le ola leaga e i ai tapuafanua e matua taua tele. E taua tele i le Malo ona faalauiloa mea ia, aua afai e 3, 4, 5 tagata e feoti mai ai, e ono molia ai le Malo i le iloa o le lamatia o le soifua i tapuafanua ia, ae e le o faalauiloa. O le tulaga foi la lena e i ai ma le faaeteetega i i isi a tatou vavau, leaga e i ai ma tatou tapuafanua e na o Samoa lava e malamalama i ai. Ua mamai ma maliliu mai ai tagata.

Lau Afioa i le Fofoga Fetalai, e tele lava mea, o mea e tatau ona fai. O galuega uma lava ia e fai e le Malo, o aualatetele, o mataupu tau internet o telefoni faitau miliona, miliona ma miliona. O le aumaiga i lalo o le sami o nei fesootaiga taugata. O mea uma e mafai ona faapea o mea uma lava ia e uunai ai le turisi, o auala taugata. O vaa lelei e feoai ai i Savaii aua o turisi, a sau e fia malaga, malaga vave, lelei auala.

O le mea lea e tatau ona manatua lelei foi e latou, o lea e fai atinae nei. Malae vaalele, ina ia felelei mai vaalele, o mo mea o uafu e taula ai meli. E le faapea e feausi mai turisi nei. A leai mea ia, e matua afaina lava ia le tatou atinae. E le itiiti la le galuega lea o lo o fai, e faitau selau ma selau miliona, mo le uunaia o turisi aemaise le initaneti. Aua a alu atu le tagata i Savaii, e fia fesootai ma lona aiga i Italia, ia lava le internet. E tele taimi e tatou te o ai i isi atunuu o le Pasefika, e fia telefoni mai i Samoa e le mafai. Ae o le a le tulaga lea e i ai Samoa? Mauuluga le atinae o fesootaiga, tuu ane i mea e taofi ai le turisi iinei, ia lava faafiafiaga.

O le ala lena lea na fai ai ia le tatou Teuila. Teuila mo le vaiaso atoa e taofi ai tagata iinei, ona tuu lea i le taimi e leai ai ni tagata e toe malaga mai. E gaogao hotels, gaogaaii vaalele. O lea la na faatulaga ai e tuu ia Aokuso o le taimi pito sili lea e le malaga mai ai ni tagata, ae o le a le mea lea ua tupu? O le taimi lea e pito sili ona tumutumu mai ai tagata aemaise o tatou aiga. Aisea? E fia omai e matamata i siva faa-Samoa. E tasi la ia mea e le maua e te le maua ni Siva Samoa i atunuu la pe a e agai i ai. E te maua i Samoa nei le mea e igoa moi o siva Samoa. O taumafa, taumafa Samoa, o a mea ia e sau le tagata mai fafo e fia taumafa i taumafa Samoa ae sau toe ai i le steak ua masani ai i Niu Sila. Taumafa i kale e maua i o i Initia.

Ae a meaai Samoa? E iu mai le tamaitiiti mai i le Kolisi foi lea e i ai nei a tatou, e sau e galue i i, i le mo mea o le service industry i le tausiga ma le serve ina o tagata e omai mai fafo, ae e faatonu atu e fai le saka, ae musu. Ae o le saka e moomia o la e fiaaai tagata mai fafo i meaai tau Samoa, e moomia ia le feoai i tua, e moomia le feoai i tua ma matamata. O le ala lena na amata ai ona fai ia le beautification, faa-aulelei o tatou nuu, ina ia atili ai ona tautaua Samoa o le atunuu e pito sili ona mama. O le mea la lea o lea e

i ai Samoa faatusa i atunuu uma o le Pasefika e sili atu ona mama Samoa, tasi lena attraction, tasi lena auala o lea omai ai tagata.

Lelei o tau o hotels, ua fiu e fai i hotels e tuu i lalo ia latou tau, i lalo ifo o Fiti, aemaise la pe a avatu le package. Avatu le package e lele mai i le vaalele, alu uma ai ma le hotel, ae o le a le mea lea e tupu? Ua leva ona alu atu i se manatu o le Malo, ae fai lava sina tuai tele o tatou faipisinisi, i hotels, tuai. O lea faatoa atamamai nei ina ua oso le Koviti faatoa iloa ai, e tatau ona tuutuu i lalo, e tatau ona tuutuu i lalo i o tatou tagata. O lea la ua tumutumu tatou hotels aemaise weekends. O le mea ua leva ona faatonu atu e fai, ae e le faia. O lea la ua faatoa talitonu nei, i le tulaga sa tatalo atu ai le Malo, ia ma isi lava mau faafiafiaga.

Faafiafiaga i le tulaga o faigafaiva, e fai mai tauvaga a latou o tautai. I le taimi e fai ai ia tauvaga nei, e le laititi ifo i le 50 tagata e omai ma o latou aiga. E le gata i lena, a o taaloga, taaloga ia e fai. E o ai ia tama taaalo i fafo, e tasi la lea auala, e ala ai ona avatu pea tupe e o ai tama taaalo ma uunai pea e le Malo ia tagata e o e taaalo i fafo, e lauiloa ai Samoa, ma atili ai na fia omai tagata e tafafao mai i Samoa nei.

O mea uma eseese uma nei, o lea e taumafai ia lo tatou Malo ina ia faatino, ina ia mafai ai ona lauiloa Samoa. E oo lava i fono tetele a le lalolagi, e tasi lea mea o lea e toso mai ai fonotaga i Samoa nei. E ala la ona ou toe faaopoopo atu i le saunoaga manino a le sui usufono, e le tasi ae lasi ia gaiouga lea e fai e lo tatou Malo, o le faalauiloa ona ia omai ai i le taimi e usu ai se fonotaga tele po o se taimi e fai ai ni taaloga mai i Samoa, e tai pei o le lakapi, e tai pei o le soka, e tai pei o le kirikiti. E tumutumu faletalimalo.

Lau Afioga i le Fofoga Fetalai, o le mea lea ou te naunau i ai, e faaopoopo atu i le Minisita, o le tele o galuega lea e faatino e le Malo, faitau selau ma selau ma selau miliona tala, po o le tuu ane i i i auala, fesootaiga, mea faapena. E oo lava i le tautua i le falemai, e tasi lea mea e ala ai ona omai isi tagata, o le i ai o le tatou faamama toto, aemaise lava ia o tatou tagata e fia omai. O i ai se faamama toto e mafai ai ona ou alu atu? Atoa ai le 2 vaiaso o ou i ina? A o le i faia ia le tatou faamama toto, e leai nisi na omai e mamai aua e feoti ai i inei, aua e tai 3 lava aso, ma toe faamama toto.

Lau Afioga i le Fofoga Fetalai, ia o si au faaopoopo atu lea, se i lava le malologa a le Minisita, ua alu le taeao o tu, e le tutusa o ma malosi. E sili atu lou malosi e tu na i lo le Minisita. Ia over to you.

Afioga Salausa John Ah Ching (Faleata Sasae): Lau Afioga i le Fofoga Fetalai, pe maua se avanoa.

FOFOGA FETALAI: O la ua ova to Pat Mamaia ae o lea ua tu mai, ia se i tu mai lau Afioga Salausa sui usufono o Faleata, po o le a sau faaopoopoga.

Afioga Salausa John Ah Ching: O se mea e fia faamalamalama faalauaitetele i le mea lea sa taua e le Afioga i le Minisita o mea tau kuka, aoga kuka, ona e i ai le piitaga tele i mea sa taua i lau lauga i mea tau soifua maloloina, ma le mafai e le tagata Samoa, ona soifua ma ola i se laueleele laitiiti o nofo ai i taimi o faamai, e taofi ai le feoai o tagata.

O le kuka la, e manaia tele le polokalame lea o le Kuka Samoa lea e alu atu i le TV. O lo o sau ai mea o lesipi po o faiga eseese o faaoga ai meaai Samoa lava ia o lo o maua i totonu o tatou atunuu. O le sasalapa, o le avoka, o le maukeni, a ua sui la le faiga o le recipe. O le isi la mea e manaia tele, lea na o ai nisi o tatou tagata i tauvaga a le Pasefika, i le kuka a le Pasefika, lea na oo lava i luga, masalo o le Quarter Final lea na palasi mai ai le Susuga ia Leiataua ma si ona faletua ia Charlotte, ia ae faaauau le isi toeaina ma si ona afafine. Na oo lava i luga masalo o le Semi Final lea na oo i ai. A o mea la ia sa matamata i ai i mea ia, o le faaogaina lava o fualaau ma mea o lo o maua i totonu o le Pasefika.

O le tuualalo la i le Afioga i le Minisita, ia ma le Matagaluega, faamolemole pe mafai ona fausia, fai se tatou pepa, oi se tatou tamai tusi, se Recipe Booklet i le faa-Samoa faa-taugofie foi, ina ia mafai e tagata Samoa ma si loomatua i tua ona fai ai kuka ia, fesuisui ai le faiga... O le taua o lea mea, ina ia sui ai le ai, sui ai le taumafa e pei foi o mea e masani ona talanoa ai si toeaina, ia o si mea faasua, ma si mea tunupau. Ia e fesuisui ai le ai, ia a o mea lava ia e tasi, a ua sui le tofo. Ioe o le fesuisui ai o le kuka, ia ma e aoga foi le mea lea, i le soifua maloloina o le tatou atunuu, ona o le faaoga o tatou mea taumafa o lo o maua lava i totonu o laufanua. E pei o se tuualalo lea i le Afioga i le Minisita ma le Matagaluega. Faafetai mo le avanoa.

FOFOGA FETALAI: Malo, o lo o tatala lava le avanoa i le tuualalo, mea faapena ina ia fau tele ai lo tatou vaa. Ia se i tulai mai le masalo o lea ua, o mea ua tele ua... fia saunoa i ai le sui usufono o lea ua tele ina faamanatu atu e le Afioga i le Taitai o le Malo ia ma le sui usufono o Faleata. Ia...

Afioga Afoa Amituanai Faleulu Maui (Palauli Sisifo): Lau Afioga i le Fofoga Fetalai, fia maua se avanoa lau Afioga i le Fofoga Fetalai...

FOFOGA FETALAI: fia saunoa i ai le sui usufono o lea ua tele ina faamanatu atu e le Afioga i le Taitai o le Malo ia ma le sui usufono o Faleata. Ia se i tulai mai le sui usufono, ia o le a se mea, sa e saunoa...

Afioga Afoa Amituanai Faleulu Maui: Sa taua i lau lauga lau Afioga i le Fofoga Fetalai, o si ou uso lea ia Sala, e tele mea sa ou fia fesoasoani i ai aua, sa ou Taitaifono foi i le Board lea...

FOFOGA FETALAI: O le a le mea o lo o fia...

Afioga Afoa Amituanai Faleulu Maui: a le Turisi. Sa ou Peresetene foi i le Sosaiete lea a le SHA o le Hotel Association. Ia e feooloolo foi lava si ou malamalama ma si ou iloa i faafitauli ia e aafia ai ia tatou hotels. Ae faafetai i lau Afioga i le Minisita, i le tulaga lea e leai se isi e toe tagi pe a toe afio mai i lea tausaga i te i e le toe sau, ia ae o lau tagi lea na e tagi ai i le Kapeneta, lea na extend ai ia aitalafu ia a nai tagata ia sa i le Development Bank.

Faafetai lava mo le fesosoani i na i ia hotels e pei o se tuualalo, e le toa-8 tagata na e involve ai i mo mea o aitalafu ia. E tele nai tagata na e aitalafu i le Development Bank, o na e aafia ai e tatau ona extend ai ia le tulaga lea, se i tagai ane i ai. Faafetai malo le vaai totoa i tulaga ia o tatou aitalafu, ae mo mea ia o aitalafu, e tele ia o nai hotels e fia totogi aitalafu. A o lona lave, ua leai se tupe,. Ia e tatou te silafia, a tapuni loa ia tatou borders, ia ma leai se tupe ma omai tagata tafafao, ia ua leai ma se tupe e totogi ai nei mea, ae tele nai tagata o hotels, o le fia totogi aitalafu ia, ae e leai se mea faapea, peiseai o le mea lena, e fesoasoani ai le Malo, e ave i ai le time, time extending mo le 6 masina, ave i ai le isi 6 masina. Aua e le faapea e le fia totogi aitalafu tagata nei. E fia totogi aitalafu, ae leai se tupe e maua. A o lea ua tatou silafia lelei, ua matua leai lava ma se tupe e maua mai i tagata foi nei tafafao.

O lea la ou te toe talosaga atu ai i lau Afioga, se i toe talosaga ane i le Minisita o Tupe e le gata ina extend le taimi o nai tagata ia, ia ma include uma ai ma nai tagata ia e fai a latou hotels. E le faapea o le le fia totogia o aitalafu, ae ua matua leai lava ma se tupe.

FOFOGA FETALAI: Faafetai. Masalo o la e ua fai e le Malo le vaega lea.

Afioga Afoa Amituanai Faleulu Maui: Faafetai lava i lau Afioga. O lea ou te manatuaina le taimi na e tagi ai, na soiso ai le Kapeneta, lea na extend ai le taimi na toe.... O le tuualalo atu lea atonu e umi atu ai le taimi mo taeao mo lau Afioga.

FOFOGA FETALAI: Ua maea Afoa le faauilavea. Ia, tulai mai le Minisita. E aoga foi le fautuaga a Palauli Sisifo mo le fesoasoani atu i lau Afioga i le Minisita ma le Matagaluega.

Afioga Hon SALA FATA PINATI: Sa saunoa nei Palauli Sisifo faapea na ou tagi, a o le fesili lea ou te nofo ma au, pe na i ai i le aso lea na tupu ai le tulaga lea pe leai?

Lau Afioga i le Fofoga Fetalai ma le paia o le Maota, na taua mea ia o aitalafu o faletalimalo. Ia, e le o faapea o i ai tuivalea i le Faigamalo. O le a faapefea ona tuu fua faletalimalo nei o lea ua silafia lelei le pagatia ma le mafatiaga lea e i ai tatou. O le a fai pea la le mea lea e moomia ai e foreclose

faletalimalo nei? E le o i ai se manatu o Tuilaepa ma le Faigamalo e faaauau le vaega lea. Na pau o lea, o le mea e faavae i le alofa, e tupu ma olaola pea. E i ai le itu lea ou te taua. E le tuua o tatou tagata e o i le malaia, e faatino mea silisili mo e o lo o manaomia le fesoasoani.

O se tala atu lea lau Afioga i le Fofoga Fetalai ma le atunuu. Afai lava ua faaletonu faletalimalo ona ua le usitaia totogiga tupe pei ona auiliili, o ai e faapogai ai? O se mea na tupu fua? O le mea muamua, e fai le saililiga, osi le feagaiga, e tatala atu, a ia e mautinoa, ia e mulimulitai i faatonuga i ala e totoi ai vaegatupe ia. E i ai le taimi e tele ai le seleni, ona fua lea pe tataua ona faatele lau tapenaga, aua e i ai aso e lelei, e i ai foi aso leaga. E feagai pea maninoa ma afa, e feagai foi afa ma maninoa.

O le mataupu la lea lau Afioga, o lea ua i le Minisita o Tupe ma le Pulega lea vaega. Ua uma foi ona saunoa i ai le Palemia, e alofa le Palemia i ona tagatanuu. Mo le faafofoga Samoa, o lea e mau lava le toovae. E le mafai ona tuua o tatou tagata e o i le malaia. E tuu i fea? O lea e moni, e sao lelei. Sa ou tagi, ae sa ou faapea leaga na ou tagi ai, (*sa faataitai e le Minisita lana tagi a o faia lana saunoaga talifuaitau*). Ae tilotilo faapea mata, ioe, tilotilo faapea.

FOFOGA FETALAI: Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neiote Aiono Galumalemana Dr. Sailele Malielegaoui: Lau Afioga i le Fofoga Fetalai, leaga o le mataupu lea ua agai i ai le toeaina. E tataua foi la ona tali le Mataupu Silisili i se manatu faa-Mataupu Silisili. E le mafai ona tuua e le Malo le tagata ia alu i le malaia, ae le mafai foi e le Malo ona taofi le tagata ua fia alu lava ia i le malaia.

FOFOGA FETALAI: Malo faafetai.

Afioga Hon SALA FATA PINATI: Faafetai. Ia, o uiga lava ia o le soifuaga, avatū aumā, ae matua lava iinei i le fale Fono ma le Maota o Samoa.

O le tulaga lea i kuka na taua e le sui usufono mo Faleata, ae, o le mea nei o le kuka o le fuluka ia o le mea, o le mea moni lava. Se o mea ia e alu alu a le kuka a le papalagi vaai atu o sasaa mai lea mea, sasaa atu lea mea, ia ona fai lea faapea o le sosi foi lenei. Ae ou te tau atu, e leai leai se isi o tatou e fia tofo ai, aua ua ou tofo ai, se pei o se art le mea. E manaia i le vaai, aua foi o foliga ia o tatou na faia e le Atua tatou. Fai mai, a e puea se ata, ia pue ia lelei. E le fia vaai se isi i se ata ae mataga. E faapea foi ona faa-display aemaise lava Iapani ma Saina. O Iapani e ave i ai le faamuamua i le display ina o lea tamai kuka ma lea kuka, ona o le... it's a form of art e display ai le uniqueness o lea custom o le tagata. E faapea foi tatou i Samoa, o le custom

lea a tatou, e atoatoa ona aumai mea. E aumai atoa i luma foi lenei le taumafataga ona pule lea o le tagata po o fea le mea e manao i ai. A o le recipe lea e taua, e tatau ona fai. Afai o lea e faafofoga mai Faamatuainu, ia Faamatuainu, vaai a tatou tusi ia ia tofo le Minisita, o le Palemia, o le Fofoga Fetalai ma le Fonousu a Samoa ma le tusi, tusi uma ai kuka eseese. E i ai foi isi au kuka pepelo la e i ai, ia e aumai foi e... a tofo ai Falealili faapea Falealili, “Sole, se o tama sasao lava tama ia alii.” Ioe. Ia o lena. Se o mea na e...

Afioga Fuimaono Teo Samuelu Teo (Falealili Sasae): Lau Afioga i le Fofoga Fetalai...

FOFOGA FETALAI: Malo. Ia, malie le sui usufono o lea e tulai mai le sui usufono mo Falealili ia Fuimaono.

Afioga Fuimaono Teo Samuelu Teo: Ona o lea ua agiga le itumalo. Faafetai lava foi i le susuga i le Minisita ma le saunoaga. Leai, o le mea moni lava ia, o le toatele ia o tagata talenia o le itumalo o Falealili i le mea lea o le kuka. Masalo o lena foi na e talitonu i ai i le tatou asiasiga, e fou foi lau tausami i ia ituaiga kuka. E ui lava ina sese le Minisita sa matou o e vaai auala ia ma turisi, ae faafetai ua e tofo ai i nisi kuka eseese. E aoga mo faletalimalo. Ia, e 3 tausaga talu ai, faamanatu ifo auala i tatou turisi na lea na ala ai ona tatou asiasi. Faamolemole lau Afioga, ma lou agaga faaaloalo.

FOFOGA FETALAI: Se alolofa aua le toe faauilavea o lea ua lata le taimi e uma ai le tatou galuega i te i ua le uma le saunoaga a le Minisita. Tulai mai lau Afioga i le Minisita.

Afioga Hon SALA FATA PINATI: Lau Afioga a fai ma ataata se mataupu o le lelei foi lea. Ia aua foi e i ai le tulaga foi lele e musua e vaai atu ua iva foi. Ona faapea lea, se e maua atu lava le ata o le toeaina la e moe mai. Ioe. Ia ona faapea mai lea, papa, mama, e maua lelei lava oe o la e te mavava mai, se i tulou lava, i le ata. Ia ae vili mai fafo, se ua e auleaga lava i lau moe lea na e moe mai ai. Ioe. E ala ona ou fai atu, aua o au lea e maua soo ai. O lea e fai mai lau fanau, aua e te moe i totonu o le Fonotaga. Ona ou fai atu lea i ai, ia anusa ea, o le umi o le Fono, ia, o le lauga e po ma ao, e fa po fa ao o lauga Tuitama. Ioe. Ia, ou te faafetai i le uso ia Dr. Tuitama o le a misia le Toeaina o le Maota. Se ou te faaigoa le aso o le aso o le Atua, aua foi o fofoga vaaia o lenei Maota ua tala mai ai le manuia ma le mamana o le galuega a le Silisili Ese, aua e eseese foliga. O foliga ita, o le foliga e mata ataata, o le foliga musua e fai se mea e lelei ai, o le foliga e fiafia. Aisea le mea e fiafia ai? Aua foi o lea ua tulata le taimi o le faaiuga o le tatou Fonotaga. E i ai la lou tagata. Ua leva ona ou manao ou te tu ia e fai se lauga

aua... e pei lava ona taua e si ou uso mai le Itupa i Lalo, ailoga a ou toe sau i le palota. E sao lelei. Ma ou te faapea ifo foi i lou agaga maualalo ma ou faapea ifo, le Alii e, le Atua oe e te pule aoao. O le mafutaga faifaipea, ia e tuua au ia ou talia mea e avea, mea lelei atoa ma mea ou te iloa e le tatau ona tupu. Ae afai foi o le faiga palota ua i ai nei ae le tau lau o le faamoemoe, ua malolo lo outou sui usufono, ou te faafetaia le Atua. Ou te faafetaia le Atua aua ua oo Lana pule silisili ma ua Ia faapea ifo i le agaga foai i Lana pule fai saoloto ua musumusuina ai le agaga o le Palemia ia tofia lenei auauna vaivai, le auauna le aoga, a ua fai se sao mo Samoa, ia, aemaise si ou itumalo, si ou itumalo pele ia te au.

Ou te le laulaua ma ou toe laulau ni galuega faatino, aua foi o la tatou lea matafaioi, e tatou te ave mea silisili, mea e pau mai ai lo outou mafai, e te mativa ai, e tamaoaiga ai, e te le maua se mea, e te lua misa ma lou aiga, e te lua misa ma lou toalua pe a tago atu ua leai se tupe. Ona e faapea atu lea, mama, e i ai se tupe i ina e fai ai le mea lea? Ae faapea mai, ia o le a lava le mea e te alu ai ua leai se tupe? Ae silasila foi, e taua le galuega. E le o upu e fai ai, a o galuega e fai. Fai ma le amiotonu ma e fai ma lou talitonuga ua e faia mea silisili mo le lua te tuaoi. Afai foi o faamuli mai o tatou tagata i fafo, faalogo mai ma lafolafola mai upu le migao, ia faamagalo i ai aua latou te le o iloa le leaga o le mea ua latou faua, o lea ua toe pu le vaa o ti'a ia ti'a lava. Ua toe faaleaga le Samoa e Samoa. Ia o tatou manatua o oe na e fanau mai, o oe o le Samoa. E te sitiseni, o oe o le Samoa. O lau tautoga e fai, e te faia mea silisili aua le manuia lautele o tagata, itumalo, lau Ekalesia, lau tapuaiga aemaise le fanau. Ou te molimau atu, e le o faapea le Maota ma le tulaga o lo o i ai le tatou Maota. Ae ui lava i lea, e leai e le o tuai. O lo o i ai lava le taimi faapaganoa ua aumai e le Atua e galueaina malie e fofoga o le Atua ma le agaga e musuia ai i tatou ia tatou maimoa i le ala, faatino o tatou tiute.

Lau Afioga i le Fofoga Fetalai, ua faaumiumi se tautalaga, ona e taua tele le tusitusiga lea ua aumai ia te au, o lea e i luma o au mai le Ofisa o le Suetusi Sili ma le Suetusi. Ona ou faapea lea, o le a taatia ia mo le taimi a nanei, o le a faapea ona tolaulau atu ai le faafetai ma le faamalo a i latou ua tusiaa o i ai le tatou Faigamalo i le lelei ma le atoatoa o le tapenaga a lau Afioga ma le Ofisa o le Palemene, atoa ai ma Komiti o le Palemene, o lea e i ai i le Lipoti lea.

Ma ou te faapea atu ai, ia faapena ona maua se malologa lelei, aua o lea ou te vaai atu, e ao ina tatou malolo lau Afioga i le Fofoga Fetalai, ou te le pule. Ae ia te au, sau taeao o malama ona faafofoga lea i le matautia ma le ofoofogia o tama fanau a Samoa ua maua Masters, ua iu mai.

Lau Afioga, talofa...

FOFOGA FETALAI: Malo faafetai. Ia, ou te faauilavea i le saunoaga a lau Afioga i le Minisita. Ia, e talu ai e fai alofa atu foi le galuega e le faigofie,

ae manatu foi e tele le tapenaga ia, e le gata i Matagaluega o lo o i lalo o lau vaavaaiga, ae faapea foi e ao ona oo i ai lau saunoaga, aua ina ia manino ma malamalama le latou foi tautua ma le auaunaga. E le gata i le Malo a o le atunuu i le latou faafofoga tapuai mai. O le mea la lea, e faapena se lagona, saili lou malosi i se taimi o lo o muamua e taliu mai ai le tatou malologa, ia ona faapena lea ona faaauau lau saunoaga e faamanino ia tulaga e pei ona i ai leaga o le mea e tatau, o le tiute e tatau ona fai.

O le mea la lea, e momoli atu le faafetai ma le faamalo. Malo alii le usufono i le paia o le tatou Palemene, malo foi le onosai. E faapea foi Ofisa Sili o Pulega o Matagaluega ma Faalapotopotoga a le Malo aemaise foi le auaunaga a le Failautusi ma le Ofisa o le Fono, le mamalu i le Ofisa o Leoleo, faapea foi le Ofisa o le Fofoga Fetalai i le Satini ma le Agai o le Maota.

Ia ona faapea lea, ua tatou taunuu i le tatou malologa e pei ona pasia tatou te malolo nei i le 1:00 ae tatou toe amata nanei i le 6:00 i le afiafi. O le mea lea ou te faasilasila atu ai ma le agaga faaaloalo, o le a faataatiaese Galuega a le Fono Aoaofaofa mo le taimi nei, tatou te toe tauaofia i le itula e 6:00 nanei i le afiafi. Faafetai.

Na faataatiaese Taulumaga a le Fono Aoaofaofa i le itula e 12:57 i le aoauli seia aulia le itula e 6:00 i le afiafi.